

١٩٦٥/١٢/٢

## كلمة الرئيس جمال عبد الناصر

وهو يستقبل أعضاء المؤتمر العام لاتحاد العمال العرب

■ من الطبيعي إن الالتقاء باتحاد العمال العرب يمثل في النفس ويجرّك مشاعر كبيرة، إن اتحاد العمال العرب إذا كان اتحاد حقيقي وفعلي - مِش بَسْ اتحاد على الورق - يستطيع أن يفعل للأمة العربية الشيء الكثير.

والطبقة العاملة أو العمال العرب النهارده بيمثلوا الطليعة في الأمة العربية كلها، والعامل اليوم له دوره النضالي، والشعوب هي التي تستطيع أن تحقق كل الأمانى، ويجب أن يكون العمال في طليعة الشعوب من أجل تحقيق الأمانى.

وكل ما أتمناه أن يكون اتحاد العمال العرب مثل وقدوة للأمة العربية كلها، مثل في إنه يكون اتحاد من أجل المثل العليا، ومن أجل الآمال التي يشعر بها الشعب العامل في جميع أنحاء الأمة العربية.

وأما أقول الشعب العامل أقصد بهذا الشعب؛ لأن الشعب الغير عامل لا يمكن أن يشعر بالمثل ولا يمكن أن تكون له آمال، لأن الشعب العامل تحققت آماله وتحققت أمانيه.. الشعب العامل اللي يمثل العمال، وكل من يعمل في أنحاء الأمة العربية.. دول لهم أمانى ولهم مثل يستطيع اتحاد العمال العرب بنضاله وبضرب المثل أن يبرهن على أن الأمانى يمكن أن تتحقق، الوحدة الفكرية بين العمال العرب تساعد على الوحدة العربية، الوحدة النضالية بين العمال العرب - ولكم فيها أمثلة كبيرة - تساعد على الوحدة العربية، والوحدة العربية بمعناها الواسع قد لا تكون وحدة دساتير، ولكنها وحدة أهداف ووحدة مشاعر.

وعكس هذا أن ينعزل كل شعب عربى فى بلده العربى، ولا يهتم ولا يسأل بما يجرى فى أنحاء الأمة العربية. إذن الوحدة العربية بمعناها الواسع ومعناها الشامل، هى وحدة الشعوب ووحدة الأهداف، بصرف النظر عن وحدة الدساتير؛ لأن وحدة الدساتير قد تقابلها عقبات كثيرة، وقد لا تتحقق فى مدى طويل.

إذا الأولى بنا أن نعمل من أجل الوحدة العربية؛ بحيث إن كل شعب عربى يشعر بأمال وأمانى الشعب العربى الآخر، وكل شعب عربى يشعر بقضايا الشعب العربى الآخر، وكل شعب عربى يدافع عن الشعب العربى الآخر إذا استدعى الأمر، كما حصل فى سنة ٥٦ حينما تعرضت مصر للعدوان الثلاثى لم تكن هناك وحدة دستورية، ولكن خرج الشعب العربى فى كل بلد عربى؛ لأن الوحدة كانت فعلاً تجمع الشعب العربى فى كل بلد عربى.. خرج الشعب العربى فى العراق فى أيام حكم نورى السعيد، الذى كان يبارك العدوان، والذى كان يتمنى أن ينتهى النظام فى مصر، وتعرض الشعب العربى فى العراق للرصاص واستشهد منه من استشهد.

كل هذا يدل على أن هناك وحدة عربية حقيقية، تجمع أبناء الأمة العربية كلها، من مشرقها إلى مغربها بصرف النظر عن الدساتير.

هناك شىء آخر أريد أن أقوله: أن القوى الرجعية وأعوان الاستعمار فى جميع أنحاء العالم العربى تتحد اتحاد قوى.. اتحاد مصالح، واتحادها من أجل ضرب القوى القومية والقوى التقدمية فى العالم العربى.. من الذى يدافع عن مكاسب الشعوب العربية؟ من الذى يكافح عن نتائج نضال الشعوب العربية فى مواجهة الرجعية وأعوان الاستعمار؟

العمل العربى القومى التقدمى الخالى من التعصب؛ بمعنى أنه واجب على جميع العناصر التقدمية والقوى التقدمية فى كل أنحاء العالم العربى، وفى كل بلد عربى أن تتحد لمواجهة أعوان الاستعمار والقوى الرجعية.. كل القوى القومية يجب عليها أن تتحد وتتنازل جميعها عن أنانيتها، وإلا فسيستطيع أعوان

الاستعمار وتستطيع الرجعية أن تضرب القوى القومية والقوى التقدمية فى معاقلها.

من الذى يحمى النضال؟ الذى يحمى النضال هو الشعب، والشعب العامل هو الطليعة والعمال هم الطليعة؛ لأن المبادئ التقدمية والعمل من أجل التقدم، إنما يعنى أن يحصل الشعب العامل وتحصل الطبقة العاملة على حقوقها المسلوبة بواسطة الاستغلال أو بواسطة رؤوس الأموال الأجنبية، وأن الطبقة العاملة والشعب العامل يحصل على نسبة متكافئة، وأن يتحول إلى مجتمع يتساوى فيه جميع الناس، لا يكون هناك ميزات طبقية.. دى آمال الطبقة العاملة ودى آمال الشعب العربى.

إذاً إذا كان لكم آمال يجب أن تكونوا فى طليعة النضال، ويجب على القادة اللى وصلوا يمكن إلى مراكز كويسة، إنهم لا ينفصلوا عن القواعد العمالية؛ لأن الانفصال عن القواعد العمالية يوقع القواعد العمالية فى براثن الرجعية وأعدوان الاستعمار.

وكلنا نعرف أن الطبقة العاملة ناس طيبين يمكن يرضوا بالقليل، وفكرهم فكر بسيط وقد تستطيع الرجعية.. ويستطيع الاستعمار وأعدوانه أن يضربوا القوى التقدمية بالطبقة العاملة؛ بأن يضللوا الطبقة العاملة ويحرفوها عن أهدافها، ويزينوا لها المعانى والتصورات المختلفة، ويمكن عندكم كلكم تجارب فى هذه المواضيع.

من واجبنا أن نعبئ القوى العاملة.. من واجبنا أن نكون طليعة للنضال، من واجب العمال فى جميع أنحاء الوطن العربى أن يتصدوا للرجعية والاستعمار وأعدوان الاستعمار.. من واجب العمال فى جميع أنحاء العالم العربى أن يكون لهم دور أساسى فى التوحيد بين القوى التقدمية والقوى القومية، ويكون لها دور نضالى ودور طليعى؛ لأن أى نكسة أول من يصاب بها العمال، وأى نكسة أول من يتأثر بها... ولما حصل الانفصال فى سوريا - وجبة بالحكم الرجعى - أول

من أصيب وأول من أضير في الحكم الانفصالي كانوا العمال، وأظن أن الإخوان السوريين اللي موجودين في المصانع اللي أُمِّتْ واللى فك تأميمها والامتيازات اللي خدوها العمال.. أول الرجعية ما استولت على الحكم قضت على كل المكاسب العمالية.

إذًا، من الذي يضار بنجاح الرجعية وأعوان الاستعمار؟ الشعب العامل.. الطبقة العاملة.. القوى العاملة.. الفلاحين اللي هي القوى اللي تعمل من أجلها القوى التقدمية وتعمل من أجلها القوى القومية، ومن الذي عليه الحفاظ على الثورة العربية والمكاسب العربية والنضال العربي؟ الشعب هو الوحيد الذي يستطيع أن يحافظ على الثورة والأهداف والأمانى والآمال.. الشعب هو الذي يستطيع أن يناضل ليحقق المكاسب.

بيقول لى الوفد السوري أنت مسئول عن الوحدة، أنا باقول للوفد السوري: لا.. أنا مش مسئول عن الوحدة.. الشعب العربي في كل بلد عربي هو اللي مسئول عن الوحدة لسبب بسيط؛ إن كل واحد بيحى ويمر وينتهى، كل شخص بياخذ أيامه وبياخذ عمره وينتهى، أما الشعوب فلا تنتهى.. الشعوب مستمرة منذ بدأت الخليقة إلى أن تنتهى الحياة.. الشعوب تستطيع أن تفعل المعجزات.

وواجبكم أنتم - العمال العرب - أن تكونوا فعلاً طليعة النضال العربى، طليعة التقدم.. طليعة القومية العربية، تضربوا المثل لكل الشعوب العربية بالتضحية والفداء، والعمل من أجل رفعة الأمة العربية؛ لأنكم الجنود التى تستطيع أن ترفع فعلاً الأمة العربية، عندنا الجنود فى الميدان تستطيع أن تحقق الانتصارات، وتستطيع أن تدافع عن أراضينا، أما العمال فهم الجنود الذين يمكن لهم أن يبنيوا فعلاً الوطن العربى، ويبنيوا القدرة العربية، ويطوروا الأمة العربية من دول متخلفة إلى دول نامية إلى دول متقدمة، تستطيع بهذا أن تحقق ما تريد بدون الاعتماد على أى قوى أجنبية، ووفقكم الله.

والسلام عليكم.

١٩٦٥/١٢/١٨

## كلمة الرئيس جمال عبد الناصر

بمناسبة عيد العلم من جامعة القاهرة

### ■ أيها الإخوة:

أجىء إليكم فى عيد العلم، كما تعودت معكم فى كل عام حاملاً معى بعض القضايا التى تخطر على بالى كلما اقترب موعد عيد العلم، وأدرت فى فكرى - استعداداً للقائكم - ما أريد أن أتحدث إليكم فيه. وإذ كنت أحرص على وقتكم وأنا أعرف أن هذا الاجتماع بطبيعته يطول.. فإنى أستاذنكم فى أن أعرض عليكم بعض الملاحظات، التى أجد مناسباً أن أضعها أمامكم هذا العام:

أولاً: أريد أن أقول أمامكم مجددًا، ومؤكداً أنه فى كل ما يواجهنا اليوم من مشاكل ومشاكل؛ فإن العلم هو أملنا الحقيقى والوحيد، وإذا كنا نرى أمامنا مخاطر انفجار زيادة السكان، وآمال مضاعفة الإنتاج ومحاولات السيطرة على جموح الاستهلاك، والحاجة الملحة فوق هذا ومعها إلى تحسين مستويات الخدمة والإدارة، فلنذكر دائماً أن العلم وحده، هو الذى يستطيع أن يسد الفجوة بين قصور الواقع وطموح المنى؛ الفكر العلمى والتخطيط العلمى والتنفيذ العلمى والمراجعة العلمية.. ذلك كله بالطبع بمعايير القيم الإنسانية، التى ارتضاها مجتمعنا منهجاً وميثاقاً.

ثانياً: إننى لا أرى انقطاعاً بين الماضى والحاضر، وأرفض أن أتصور وجود فراغ بين مراحل التطور لشعب واحد. إن تاريخ مصر العظيمة لم يبدأ

بثورة ٢٣ يوليو، وإنما قيمة ٢٣ يوليو الحقيقية فى أنها استطراد طبيعى لنضال الشعب المستمر، وطاقاته المتجددة، وآماله البعيدة، إن تفكير ما قبل الثورة كان ضميره فى ضمير الثوار، وحركة جيل سبق حتى فى أصعب ظروف اليأس والتردى.. كانت الحافز إلى حركة جيل لحق وتقدم للأمانة بالعزم والشباب، وذلك هو خط التطور السليم ومسلكه.

أقدم بذلك لكى أعبر عن شعورى صادقاً بأننا لم نوفر حتى الآن اهتماماً كافياً أو حوافز كافية لأجيال الشباب، وإذا كان من حقنا أن نلتفت إلى احتمالات الإبداع التى حققت نفسها بالفعل ونكرمها.. فإنه من واجبنا أن نتطلع إلى احتمالات الإبداع، التى مازالت تناضل لتحقيق نفسها وأن نشجعها.

ثالثاً: فى نفس اللحظة، فإننى أريد أن ألفت النظر أمانة إلى أن أجيالنا الجديدة المتأهبة للخلق العلمى والفكرى والفنى، مطالبة بأن تعانى بجد أكثر متطلبات ما نذرت نفسها له.

إن النجاح أمر صعب والاحتفاظ به أمر أصعب، وعمل العالم أو المفكر أو الفنان ليس ضربة حظ تسبح به وسط أضواء الإعجاب أو الشهرة، وإنما الخلق المبدع عناء وعذاب كل يوم. وأود أن أضيف أن مجتمعنا أعطى فرصة لحرية الفكر والثقافة، غير متاحة فى كثير من البلدان، وإذا قلنا باحترام القديم ووضعه فى مكانه الكريم من حركة التطور العام، وإذا قلنا فى ذات الوقت بتشجيع الجديد.. فإن هذا الجديد مطالب أمام مجتمعه بأن يبدأ شق طريقه بنفسه، وأن يدرك أن بناء أساسه العلمى هو إثبات الشخصية، الذى يستطيع التقدم به إلى المجتمع طالباً فتح الأبواب.

إن الإبداع لا ينتقل من جيل إلى جيل بمجرد الإرث؛ وإنما بالجدارة المؤكدة وبالاستحقاق الشجاع.. إن النجاح السهل كالشهب البارقة لا تلبث أن تتلاشى وتضيع فى الظلام، ونحن لا نتصور ولا نريد للجيل الجديد أن يهرب من الصعب إلى السهل، وأن يستعيض عن بلوغ القمم الشامخة بالتسكع فى

الوديان.. إننا نؤمن أنفسنا من الزلزل بتقدير ما أثبت ذاته وفرض قيمته بغير جدال، ولكنى أقول أيضاً بأنه من الضروري - فى نفس الوقت - أن نقبل بمخاطرة محسوبة وأن نعطي من التقدير مقدماً ما هو لازم لجيل جديد، لم يتمكن بعد من اجتياز حدود المحاولة والتجريب، نساعد بطاقتنا ولا نتركه لضغوط الظروف تجرفه إلى حيث تشاء، ونشد يده ليصعد ولا نتجاهله حتى يتمكن - ضد العزلة والوحشة - من أن يثبت ذاته ويفرض قيمته بغير جدال.

رابعاً: أن ذلك يقودنا إلى موضع آخر لابد أن نوليه قسطاً أكبر من الاهتمام، نحن نراجع خططنا فى الإنتاج وفى الاستهلاك، ونحن نحشد طاقات جديدة لدفع آمالنا إلى حيث نتمنى، لكن أهم من ذلك - فى تقديري خلال هذه المرحلة ونحن الآن فى مناسبتها تماماً - أن نراجع خططنا فيما يتعلق بالأفراد.. إن الطاقة الضخمة على أرضنا هى البشر وعمل البشر، وإنى لأرى أننا بددنا ومازلنا نبدد فى هذه الطاقة بغير تنظيم حازم يفرض الرجل الصحيح فى المكان الصحيح، وكثيراً ما تركت نفسى طويلاً لخطابات أتلقاها من شبابنا، الذين عادوا من البعثات حاصلين على أعلى الدرجات، وأصلين فى العلم إلى أشد ما نحتاج إليه، ولقد شعرت فى عديد من المرات أن بينهم من عاد ليجد نفسه مكلفاً بما لا يصلح له، فى حين أن الشعب تكلف غالباً ليعده ويحسن إعداده لمكان أبعد عنه؛ ذلك إهدار لأعلى طاقاتنا وإهدار لتكاليف فادحة دفعها الشعب.. وإهدار لوقت لا يعوض فى عصر، تتسابق فيه الشعوب إلى التقدم بالساعات وبالثوانى.

خامساً: يتصل بهذا موضوع آخر، هو شبابنا الذى يدرس الآن خارج وطنه استعداداً ليوم يعود فيه إلى المشاركة فى الكفاح العملى لوطنه، وأخشى أحياناً أننا نبعث الصفوة من شبابنا إلى قارات العالم؛ ليحصلوا على علمها المتقدم ثم ننساهم بعد الرحيل. ولقد أثر فى كل التأثير ما رواه لى أخى عبد الحكيم عامر عن لقاء له مع شباب بعثتنا فى باريس، لقد هزّه - وهزنى

معه - إحساسه هناك بعزلة هذا الشباب عن وطنه، وما يجرى فيه. ولقد اقترح على عبد الحكيم عامر ووافقت على أن يعقد في الصيف القادم - بمشيئة الله - مؤتمر لشبابنا في البعثات؛ ليجيء إلى الوطن أكبر عدد من ممثليه؛ لكي يلمسوا بأيديهم نبض شعبهم مرة أخرى، وليتدارسوا معنا في الوسائل، التي تعمق ارتباطهم بالعمل اليومي ل جماهير شعبهم، مهما بعدت بهم المسافات عن أرض الوطن.

### أيها الإخوة:

لقد عرضت أمامكم ما خطر لي وأنا أتأهب للقائكم، ثم أدعو الله لهذا الوطن، مهد الحضارات وملتقاها، بأن يظل دائماً شريكاً مسئولاً وفعالاً في رسالة النور والمعرفة.

والسلام عليكم ورحمة الله.

١٩٦٥/١٢/٢١

## خطاب الرئيس جمال عبد الناصر

من بور سعيد بمناسبة عيد النصر

### ■ أيها الإخوة المواطنين:

لقد دخلنا في بداية السنة العاشرة من عصر ما بعد السويس، بدأت المعركة التي تحقق فيها النصر الذي نحتفل به في ٢٩ أكتوبر سنة ١٩٥٦، واكتملت سنوات الذكرى التاسعة في أكتوبر الماضي، وبدأت السنة العاشرة لعصر ما بعد السويس.

وأنا - أيها الإخوة - لوائح أن تاريخ النضال الوطني المصري والقومي العربي سوف يعتبر السويس فاصلاً حقيقياً بين ما قبلها وما بعدها، ويؤرخ حين يُؤرَّخ بِقَبْلِ السويس وبعد السويس، وكان لكم أنتم شعب بورسعيد الياسل المناضل الفضل الكبير؛ لأنكم كنتم الدرع الذي تلقى الضربة.. كنتم الدرع الذي تلقى العدوان، كنتم المثل الكبير للشعب وللأمة العربية كلها، بل للعالم كله، على أن الشعب إذا أراد أن ينتصر فلا بد أن ينتصر، حتى ولو كان في مواجهة الدول الكبرى.

في سنة ٥٦ كانت بورسعيد هي نقطة التحول في السويس، وقلت لكم في الأعياد اللي فاتت، وأقول لكم النهارده وأنا واثق من الكلام اللي باقوله: إن ثورة الحرية الحقيقية في مصر، كانت هي بالذات الـ ١٥٠ يوم ما بين ٢٦ يوليو سنة ٥٦ إلى ٢٣ ديسمبر سنة ٥٦؛ بين تأميم القناة وبين انسحاب الدول، التي قامت

بالعدوان الثلاثي علينا. الـ ١٥٠ يوم دول عملوا تحول عميق؛ سياسى واجتماعى وعسكرى، فى العالم العربى، وكانت المرحلة الفاصلة فى الـ ١٢٠ سنة اللى ابديت من سنة ١٨٤٠ لما أرغموا مصر على الركوع، ووقعت معاهدة لندن.. التى سلبت مصر فرصة التحرر، التى برقت ثم خبت فى عهد محمد على.

منذ لحظة الركوع المهينة فى تاريخ مصر وعبر الـ ١٢٠ سنة إلى ما بعد السويس، كانت الـ ١٥٠ يوم التى حدثت فيها ثورة الحرية، هى الذروة المنتصرة.. القمة العالية التى شرف بها النضال المصرى والعربى وطناً وبشراً، واستعاد كرامته وملك إرادته. من ٢٦ يوليو سنة ٥٦ إلى ٢٣ ديسمبر سنة ٥٦ عشنا ١٥٠ يوم مجيدة؛ أحدثت كل التحولات السياسية والاجتماعية والعسكرية.

يوم ٢٣ يوليو سنة ٥٢ كان يوم الثورة؛ يوم العزم على الثورة والقبول بمسئولياتها ومخاطراتها.. فى هذا اليوم استولت القوى الوطنية على السلطة، وكان هذا التغيير الثورى فى حد ذاته، ولكنه لم يكن التغيير الثورى الحاسم، كان عندنا الإنجليز.. كان عندنا الاحتلال.. كان عندنا قوات احتلال ٨٠ ألف عسكرى إنجليزى موجودين فى بلدنا.. (الجماهير تردد: أهو ربنا خذهم).

يوم ٢٣ يوليو سنة ٥٢ حينما استولت الثورة على السلطة، كان هذا هو التغيير الثورى، ولكن لم يكن التغيير الثورى الحاسم.. السنين الأربعة بين يوليو ٥٢ إلى يوليو ٥٦ كانت أشبه ما تكون بفترة استعداد وتحفز وتأهب للصدام المحقق مع الاستعمار، ومع كل القوى المتعاونة معه داخل الوطن؛ زى ما نصت على هذا المبادئ الستة التى قامت عليها الثورة.. المبادئ الستة التى قامت عليها الثورة: القضاء على الاستعمار والقضاء على أعوان الاستعمار من الخونة، دا كان أول مبدأ من مبادئنا الستة.

هل استطعنا أن نقضى على الاستعمار من أول يوم؟ لا.. هل استطعنا أن نقضى على أعوان الاستعمار من أول يوم؟ لا.. هل استطعنا أن نقضى على الانتهازية والقوى المستغلة من أول يوم؟ لا.. إذاً من سنة ٥٢ لغاية ٢٦ يوليو

سنة ٥٦ كنا نستعد، وكنا نحشد قوانا حتى نستطيع أن نواجه الصدام بين إرادتين: إرادة الوطن وإرادة المستغلين.. إرادة الحرية وإرادة غاصبي الحرية. وفي نفس الوقت في سنة ٥٦ خرجوا الإنجليز في شهر يونيو سنة ٥٦، وتحمرت بلادنا لأول مرة من أكثر من ٧٠ سنة من جنود الاحتلال.. جنود الاستعمار اللى ادؤنا وعود، لا أول لها ولا آخر، على أن تجلو، تحررنا في سنة ٥٦، ولم يكن من الضروري أبدًا أن الصدام اللى احنا كنا بنستعد له ينتهى بالحرب المسلحة كما حدث فعلاً، ولكن كان علينا احنا.. احنا الشعب اللى قام بالثورة.. الشعب اللى حشد قواه.. الشعب اللى استعد حتى تكون الثورة ثورة كاملة وثورة شاملة.. كان علينا أن نتوقع الحرب، ليه؟ لأن المسألة صدام إرادات.. إرادة الوطن وإرادة المستغلين.. إرادة الحرية مع إرادة غاصبي الحرية، وفي حالتنا.. فى حالة ثورتنا اللى قامت سنة ٥٢، وكان فيه احتلال، وكان فيه استغلال، وكانت فيه رجعية وكانت القلة تحكم، كنا نتوقع أن لا بد أن يحصل الاصطدام، كان يجب أن نتوقع أن يكون الاصطدام أيضاً عنيفاً، وكان يجب أن نتوقع أن يكون الاصطدام مموياً. لقد كان الاستعمار يدرك، واحنا أيضاً كنا ندرك من أول يوم للثورة أن حرية مصر - كنتيجة لانتصار إرادتها فوق إرادة الاستعمار - سوف تكون لها آثار بعيدة المدى؛ آثار بعيدة فى مصر نفسها، وآثار بعيدة فى العالم العربى الذى تنتمى مصر إليه، وآثار بعيدة فى إفريقيا، وآثار بعيدة على كل حركة التحرير الوطنى، ومقاومة الاستعمار فى العالم.

وكلنا النهارده لو نستعرض هذه السنوات - فى السنين الـ ٩ اللى فاتت - بعد أن وقع فعلاً الاصطدام الدموى العنيف بيننا وبين الاستعمار، بنشوف ونلمس ونستعرض فعلاً إيه الآثار البعيدة اللى حصلت فى مصر؟ كيف انتقلنا من مجتمع رأسمالى؛ مجتمع مستغل، إلى مجتمع اشتراكى؟ كيف انتهى حكم الطبقة وقام بدلاً عنه حكم قوى الشعب العاملة؟ كيف انتهى حكم الاستغلال؟ كيف انتهى تحالف الاستعمار مع الرجعية؟ كيف انتهى أعوان الاستعمار؟ كل هذا نستطيع أن نتخيله ونستعرضه فى عقولنا. حصل بعد انتصارنا فى سنة ٥٦ بعد ما بقت

الثورة بتاعتنا اللي قامت سنة ٥٢، واستعدت طوال السنين الأربعة ثورة حاسمة فعلاً، ثورة متحررة من قيود كثيرة كانت موجودة، يوم ٢٣ يوليو سنة ٥٢، أولها قيد الاستعمار والاحتلال البريطاني.

فى العالم العربى.. كلنا نعرف أن حرية مصر كنتيجة لانتصار إرادتها فوق إرادة الاستعمار كانت لها آثار كبيرة فى العالم العربى، كيف انتفض العالم العربى فى كل مكان فى جميع أنحاء الأمة العربية.. كيف تصدى الشعب العربى فى كل مكان فى جميع أنحاء الأمة العربية للاستعمار وأعوان الاستعمار، وكيف تصدى للرجعية، وكيف تصدى للاستغلال.. وكيف ثار الشعب العربى بعد أن انتصرت مصر؛ لأنه رأى بالمثل الواضح أن النصر ليس بالأمر العسير؛ كان هذا يدركه الاستعمار، واحنا أيضاً كنا ندركه فى إفريقيا، كيف كانت معركة السويس نقطة تحول فى إفريقيا.. كيف أعطينا المثل لإفريقيا كلها، إن أى شعب له إرادة الحياة ويصمم على أن ينتصر، يستطيع أن ينتصر، ولو كان فى مواجهة الدول الكبرى والدول العظمى والأساطيل؛ أى شعب يستطيع إذا كانت له الإرادة القوية أن يتحول أبناؤه إلى أجسام من فولاذ.. من حديد، اديتم هنا المثل فى بورسعيد حينما تعرضتم للغارات، وحينما تعرضتم للعدوان.. اديتم المثل الكبير إن الطوب داب والحديد داب، ولكن الرجالة ما دأبوش ولا النساء ولا الأطفال، شوفوا المثل دا فى ٥٦ لكل العالم، وأثار بعيدة فى إفريقيا وانتصرت الشعوب فى إفريقيا، وكافحت كل شعوب إفريقيا، ولا زالت باقى الشعوب الإفريقية التى يجثم عليها الاستعمار، تناضل وتكافح وتقاتل فى أنجولا وفى موزمبيق، وفى غينيا التى تحتلها البرتغال، فى روديسيا وأيضاً فى جنوب إفريقيا، وكان انتصار مصر سنة ٥٦ أكبر مشجع، وأكبر مثل لهذه الدول أنها تستطيع أن تقاتل ولا ترهب الدول الاستعمارية الكبرى، وكان لها - لمعركتكم - آثار كبيرة على كل حركة التحرر الوطنى ومقاومة الاستعمار فى العالم.

حشدت الجهود لمقاومة الاستعمار، والقضاء على القواعد العسكرية ومناطق النفوذ والتمسك بالحرية الحقيقية. بعد معركة السويس انتهى حلف بغداد.. سقط

حلف بغداد.. سقطوا أعوان الاستعمار بعد معركة السويس، راحت القواعد اللي كانت موجودة، بعد معركة السويس القوى الوطنية فى كل مكان من أنحاء العالم بصت.. وأظهرت رأيها وشعورها، وهى على ثقة من أنها تستطيع أن تنتصر.

طبعا قبل معركة السويس كنا نشعر بهذه الآثار، وكان الاستعمار أيضا يشعر بهذه الآثار، ولم يكن الاستعمار على استعداد لأن يسلم بسهولة، وبالتالي بعد الجلاء بكام شهر رجعوا تانى، واعتدوا علينا واحتلوا بورسعيد، ولم يكن شعب مصر على استعداد أبداً لأن يستسلم، وبالتالي فقد استمات فى المقاومة حتى تحطمت كل خطط العدوان، وفشلت أغراضها.

بهذا العمل وليس بأى شىء غيره - بكفاحكم واستشهاد أبنائكم وإخوتكم، وبتعبئة شعب مصر واستعداده للقتال والاستشهاد - وقعت الثورة الحاسمة الحقيقية، واسترد الشعب المصرى كرامته وإرادته كاملة؛ ليستعملها فى تحقيق الحرية.. الحرية اللي كافح من أجلها أبؤنا وأجدادنا.. الحرية اللي قام الجيش يطالب بها فى ثورة عرابى.. الحرية اللي قامت ثورة سنة ١٩١٩ تطالب بها.. الحرية اللي أيام ما كنا فى المدارس كنا بنطالب بها.. الحرية التى من أجلها كان الاستشهاد بين أبناء مصر كل سنة؛ سنة ٣٥، سنة ٣٦، سنة ٤٧، كل هذه كانت معارك من أجل الحرية.. الحرية الحقيقية اللي كنا بننادى بها، احنا كنا بنقول يحيا الاستقلال، وتحيا الحرية، يسقط الاحتلال ويسقط الاستعمار.. كنا عايزين نخرج.. نخرج الإنجليز من بلدنا، ليه؟ حتى تعود بلدنا لنا وحتى نكون أحراراً فى بلدنا، أحرار فعلاً لا قولاً، كنا نريد أن نقضى على الاستعمار وأعوان الاستعمار؛ وبهذا نستطيع أن نقضى على الاستغلال، وأن نقضى على الرجعية وأن نقضى على حكم الطبقة.

حينما كنا ننادى بالاستقلال وننادى بالحرية، كان هذا يتمثل فى خروج قوات الاحتلال البريطانى من مصر.. قبل الثورة لم تكن هناك حرية، ازاي نقدر نقول حرية وفى البلد قاعدة للأجانب المحتل؛ هنا فى منطقة السويس؟! ماكانش فيه حرية أبداً، وماكانش فيه حرية سياسية بأى حال من الأحوال.. كلنا نعرف

ازاى كان السفير البريطانى، حتى بعد ما اتغيرَ المندوب السامى إلى سفير بريطانى كان يستطيع إنه يغير الوزارات، كلنا نعرف ازاى السفير البريطانى قبل الثورة بسنة اعتذر عن مقابلة رئيس الوزارة فسقطت الوزارة.. كلنا نعرف كده، كلنا نعرف اللى كان بيتحكم؛ إذا لا يمكن بأى حال أن نتكلم أو نقول عن قيام حرية وفى البلد احتلال وقاعدة للأجنىبى.. القاعدة الأجنبية معناها القضاء كلية على الحرية السياسية، وكانت القاعدة الأجنبية فى بلدنا تمثل لكل واحد فىنا نذل الاحتلال.. رغم المظاهر اللى كانوا عاملينها؛ رغم البرلمان والمناقشات البرلمانية، رغم الدستور اللى كان موجود.. رغم دا كله كل واحد كان عارف إن إنجلترا بتحكم مصر، طالما فيه قاعدة أجنبية تبقى الدولة المحتلة هى التى تحكم، ولا يمكن بأى حال من الأحوال أن تكون هناك حرية سياسية؛ إذا قبل الثورة ماكانتش فيه حرية.

وازاى نقدر نقول بقيام الحرية ومفاتيح الاقتصاد المصرى كلها - بما فيها تجارة القطن، والبنوك، وشركات الأراضى، والتأمين والتجارة الخارجية - ملك للمصالح الأجنبية، ازاى؟! إذا كانت بلدنا ثرواتها مش فى أيدينا، ثرواتها فى يد الأجانب، ويمكن الأجانب بيدوا بعض الناس.. بعض الناس من المصريين اللى بيتعاملوا معاهم، لكن هل كان الشعب فعلاً يملك ثرواته؟! هل كان الشعب فعلاً يملك اقتصاده؟! لم تكن هناك حرية قبل الثورة؛ لأن الاقتصاد لم يكن أبداً فى أيدى الشعب، ولكنه كان فى يد المصالح الأجنبية.

وازاى نقدر نقول إن قبل الثورة كان فيه حرية وتوزيع الثروة فى البلد - فى وطننا - كان يجرى على الرقم اللى عارفينه كلنا عن ظهر قلب؟! نصف فى المية من السكان فى مصر يحصلون على ٥٠% من الدخل القومى، نصف فى المية.. الطبقة اللى كانت تحكم وتستغل، وتدخلى فى الأحزاب وتدخلى فى الوزارات.. الطبقة التى كانت تمثل تحالف الإقطاع مع الرأسمالية.. الطبقة التى كانت تتعاون مع الاستعمار؛ لأن الاستعمار كان يؤمن لها مصالحها، أمال الباقى فمين؟ الباقى كانوا فى خدمة النصف فى المية، الفلاحين فى خدمة الإقطاعيين،

العمال فى خدمة الرأسماليين.. بقية الشعب مغلوب على أمره، ما يقدرش يتكلم، الشغل لمين والعمل لمين؟ لهذه الطبقة، الطبقة الللى هى نص فى المية، التعليم لمين؟ لهذه الطبقة.

استطاعت الطبقة المتوسطة إنها تشق طريقها بصعوبة وبالصنك، وكان الواحد من دول بيكون موظف ويقطع من قوته الفلوس علشان يودى ابنه المدرسة، أو يودى ابنه الجامعة، ويلبسه، ولكن كانت خيرات بلدنا كلها ٥٠% من الدخل القومى لـ نصف فى المية والـ ٥٠% الباقية لـ ٩٩,٥%.

طبعاً لا يمكن بهذا أن نقول إن كانت هناك حرية، أبداً.. كان فيه استغلال.. كان فيه حكم طبقى.. كان فيه تحكّم طبقى.. كان فيه تحالف بين الإقطاع ورأس المال.. كان فيه تحالف بين الرجعية والاستعمار.. وكان الحكم - نتيجة لهذه الأوضاع السياسية والعسكرية والاقتصادية - تحتكره الطبقة المستغلة المتعاونة مع الاستعمار، الحكم تحتكره الطبقة المستغلة المتعاونة مع الاستعمار.. كانت هى التى تحكّم، وكانوا يتكلموا ويقولوا الضمانات الاجتماعية، وزارة الشؤون الاجتماعية حتعمل ضمانات اجتماعية وتوزع حسنات.. احنا شعب مش عايزين حسنات.. احنا شعب عايز حقوقه، ازاي نبقى فى بلدنا وناخذ حسنة فى بلدنا؟ عايزين فرص العمل، عايزين نشارك فى ثورة بلدنا.. عايزين نشارك فى حقنا.. عايزين.. عايزين نسترد حقوقنا المغصوبة، الللى استولى عليها نص فى المية من أهل بلدنا بمعاونة الاستعمار.. ماكانش فيه حرية بأى شكل من الأشكال.

وسط الاستقلال الللى كنا عايشين فيه قبل الثورة لم يكن إلا سخرية أمام كل ما هو واقع فى مصر؛ تحت سمع وبصر الشعب المصرى.. واستمر هذا الوضع حتى قامت الثورة فى يوم ٢٣ يوليو سنة ٥٢. وأقول إن حتى بعد ٢٣ يوليو ونجاح الثورة يوم ٢٣ يوليو ويوم ٢٦ يوليو لم تتحقق الحرية تلقائياً، ماخرجوش الإنجليز على طول، ما استرديناش حقوقنا المغتصبة الللى فى إيد المصالح الأجنبية، والللى فى إيد المستغلين من بلدنا، ولكن بعد ٢٣ يوليو و٢٦

يوليو نقدر نقول إن سلطة الحكم أصبحت فعلاً مستقلة عن نظام الاستغلال الاستعماري والإقطاعي السائد.

الحكومة التي قامت في مصر بعد قيام الثورة.. ماكانتش الحكومة تاخذ أوامرها من سفير بريطاني أو غيره، وماكانتش حكومة تاخذ أوامرها من تحالف الإقطاع مع رأس المال.. دا اللي فعلاً استطعنا إن احنا نحققه يوم ٢٣ يوليو سنة ٥٢.. يوم ٢٥ يوليو الإنجليز ادونا إنذار، كنا لسه جداد يعني.. بقى لنا يومين وبنسمع الإنجليز، وكان أنور السادات في إسكندرية وجيه الوزير المفوض البريطاني، وسلمه إنذار بالنسبة للعيلة المالكة، وطلب منع تجول، وطلب طلبات، ولكنا في نفس اليوم رفضنا هذا الإنذار بعد الثورة بـ ٣ أيام، وكانوا الإنجليز موجودين في القتال، وحركنا قواتنا خارج القاهرة، وكنا على استعداد أن نقاتل من أول يوم، ماكانش أبداً على استعداد إن احنا ناخذ أوامر ولا ناخذ نصايح.. ماكانش أبداً مستعدين أن نتنازل عن المبادئ الكبيرة اللي أمنا بها، واللي آمن بها شعب مصر على مر السنين.. ماكانش مستعدين نتنازل عن المعنى اللي كان يقصده شعب مصر وهو ينادى بالحرية والاستقلال.. الحرية أن نتخلص من نظام الاستغلال الاستعماري، ونتخلص من نظام الاستغلال الإقطاعي والرأسمالي.

رغم إن الإنجليز قعدت لهم قوات هنا من سنة ٥٢ إلى سنة ٥٦، ولكن من يوم ٢٣ يوليو ٥٢ انتهت سلطة الإنجليز على الحكومة، وكنا احنا مستعدين نقاتل، وكنا ننوي أن لا بد من خروج الاستعمار.. لا بد من خروج الاستعمار، وكان شعورنا إن الاستعمار إذا لم يخرج فان احنا حنحول الأرض إلى ميدان قتال بالنسبة لهم، أنتم حضرتم هنا في السنين اللي حصل فيها أعمال الفدائيين، وكثير منكم اشترك في هذه الأعمال، دا اللي حققناه يوم ٢٣ يوليو أكثر من كده ما نقدرش نقول إن احنا حققنا.. ابتدينا طبعاً نحقق أهداف الحرية في القضاء على الإقطاع؛ اللي هو يمثل الهدف الثاني من أهداف الثورة.

وكان قدامنا تناقض مع المصالح القائمة، الأحزاب اللي كانت بتحكم والسياسيين، واللي احنا اتصلنا بهم وقلنا لهم اتفضلوا تولوا السلطة، تولوا السلطة

ولكن حققوا لنا المبادئ الستة، حددوا ملكية الأرض، كان قدامنا احتمال من اثنين؛ يا تمضى احتمالات الثورة - مجرد احتمالات - ونحقق الثورة الكاملة، ونصفي كل ما هو متناقض مع الحرية، وإما أن تنقض المصالح القائمة بقوة ما تملكه لتفقد انقلابًا لتستولى به على السلطة السياسية مرة ثانية؛ زى ما كانت قبل ٢٣ يوليو، وتقصى على كل أمل فى الثورة.

الأربع سنين قبل السويس؛ قبل العدوان.. السنوات اللى وصفتها دلوقت فى كلامى بأنها كانت سنوات الاستعداد والتأهب، وسنوات التحفز وسنوات الحشد، حاولت القوى المعادية للثورة بكل طريق حتى المساومات والغواية أن تستنزف المقاومة وقدرة الاحتمال، لكن أصالة النضال المصرى استماتت فى تمسكها بهدفها؛ حتى اضطر الاستعمار إلى أن يفرض دموية الصراع، ويعتدى علينا ليحتل بلدنا. وكانت مفاجأة الاستعمار الكبرى فى معركة بورسعيد أن الشعب المصرى لم يتردد، ولم يتراجع ولم يستسلم، وإنما وقف شريفًا شجاعًا، واجه المؤامرات ورفض الإنذارات، وتصدى للجيوش والأساطيل، وتحمل الغارات التى تعرضت بورسعيد لأعنف موجاتها، فى يوم واحد عاشت بورسعيد تحت إرهاب ٣٧١ غارة جوية، احترقت أحياء فى بورسعيد، وتهدمت بيوت فى بورسعيد، ولكن لم تتهدم مبادئها، أبدًا.. قويت، وذا كان أساس النصر.

فشل العدوان وابتلع البحر جيوش المعتدين بالهزيمة، كما قذف بهم قبلها على شواطئنا بالحقد المجنون. فى السنوات الأربع قبل معركة بورسعيد.. سنوات الاستعداد والتأهب والتحفز والحشد، حاولت القوى المعادية للثورة بكل طريق إنها تقضى على الثورة.. تقضى على المقاومة، واصطدنا بالأحزاب، وأعلننا قانون الإصلاح الزراعى، وقالوا إن قانون الإصلاح الزراعى لن ينفذ، ولكن تصميم الشعب المصرى مكن من تنفيذ قانون الإصلاح الزراعى، وحلت الأحزاب، واصطدنا مع حزب الإخوان المسلمين فى الأربع سنين سنة ٥٣ وسنة ٥٤، وكان الإخوان المسلمين فى هذا الوقت يريدون أن يؤثروا على احتمال الثورة، ويعملوا من أنفسهم أوصياء على الثورة، واختلفنا، وأعلنوا

الحرب علينا، وأطلقوا على الرصاص فى سنة ٥٤، يوم ٢٦ أكتوبر فى إسكندرية، وبدأ صراع، واعتقل أعضاء الإرهاب فى حزب الإخوان المسلمين، وحوكموا.

فى سنة ٥٤ كنا بنتفاوض مع الإنجليز علشان الجلاء، وفى نفس الوقت كان الإخوان المسلمين يعقدون اجتماعات سرية مع أعضاء السفارة البريطانية، ويقولوا لهم: إن احنا سنستطيع أن نستولى على السلطة، وسنستطيع أن نعمل كذا وكذا، واتفاوضوا معنا، وكان الإخوان المسلمين كحزب لا يمثل أبداً الشعور اللى بنشعر به فى مصر.. المرشد لحزب الإخوان المسلمين فى هذا الوقت أيام ما كنا بنحارب فى القنال سئل: ايه موقفكم من الحرب فى القنال؟ قال: احنا والله دعوة واسعة، أنتم هنا فى مصر قد تكون مصلحتكم إنكم تحاربوا فى القناة، واحنا نرى إن المصلحة أن نحارب فى بلد آخر.. زى دعوة الإخوان المسلمين.. كلام كله تضليل، وكلام كله تجارة بالدين.

فى سنة ٥٣ كنا نريد فعلاً مخلصين إن احنا نتعاون مع الإخوان المسلمين، على أن يسيروا فى الطريق الصحيح والطريق السليم، وقابلت المرشد العام للإخوان المسلمين، وقعد وطلب مطالب، طلب إيه؟ أول حاجة قال لى يجب أن تقيم الحجاب فى مصر، وتخلي كل واحدة تمشى فى الشارع تلبس طرحة! كل واحدة تمشى.. وأنا قلت له: يعنى إذا الواحد قال هذا الكلام يقولوا رجعنا لأيام الحاكم بأمر الله؛ اللى كان بيخلي الناس ما يمشوش بالنهار ويمشوا بالليل، وأنا فى رأى إن كل واحد فى بيته هو اللى ينفذ هذا الكلام، فقال لى: لا، أنت باعتبارك الحاكم مسئول، قلت له: يا أستاذ أنت لك بنت فى كلية الطب، مش لابسة طرحة ولا حاجة! ما لبستهاش طرحة ليه؟! إذا كنت أنت مش قادر تلبس بنت واحدة اللى هى بنتك طرحة.. عايزنى أنا أنزل ألبس عشرة مليون طرح فى البلد؟!

المرأة ما تشتغلش؟! أنا فى رأى إن المرأة حينما تعمل نحن نحميها؛ لأن اللى بيضلوا بيضلوا ليه؟ من الحاجة.. من الفقر، بنعرف واحدة إنها عيانة أو

أما عيانة وما لقيتس فلوس -كلنا نعرف الحكايات اللي كانت تحصل بهذا الشكل- اضطرت تفرط في نفسها؛ إذا العمل هو حماية للمرأة، أما منع المرأة من العمل فهو ضد صالحها، نحن فعلاً نحرر المرأة بأن المرأة تعمل وتتكاتف مع الرجل.

طلب حاجات بقى بعد كده بنقفل السينما وبنقفل المسارح.. بنخليها ضلّمة خالص يعنى.. ما كانت ممكن طبعا نعمل هذا الكلام. اصطدموا معنا بعد الحاجات دي، وبدأوا في ٥٤ بالتضليل تحت اسم الدين، وبدعوا محاولة الاغتيال، وفي نفس الوقت حوكموا بمحكمة الثورة.

السنة اللي فاتت سنة ٦٤ قبل الدستور، قلت عفا الله عما سلف وطلعتهم كلهم من السجن، وعملنا قانون يرجع كل واحد فيهم إلى عمله بماهيته، وياخذ دوره في الترقى وكل شيء.

سنة ٦٤.. في سنة ٦٤ عملنا هذا القانون وطلعوا، في سنة ٦٥ مسكنا مؤامرة الإخوان الجديدة، الجهاز السرى وخطط الاغتيالات والتدمير، وكلام الواحد أما يشوفوا بيستغرب! بيقولوا إن كل هذا الشعب شعب كافر، وماحدش مسلم غيرهم، وهم عليهم إنهم يستولوا على السلطة، وربنا اللي يحكم مش الإنسان اللي يحكم! طيب ازاى ربنا يحكم إلا إذا كان له رسول؟! كلنا عارفين في أول الإسلام كان هناك رسول. يقول لك إن احنا نرفض التمثيل الشعبى ونرفض البرلمان.. نرفض كل هذا ولكن حكم الله، مين حكم الله؟ المرشد أكبر واحد فيهم هو خليفة الله، وهو رسول الله واحنا كلنا كفرة، مش احنا بس.. كل العالم.. كل الدول العربية اللي هم قاعدين فيها النهارده.. وكل الدول العربية دي كافرة بملوكها برؤسائها، كل واحد فيهم كافر.. دا الكلام اللي قالوه، وماحدش مسلم غير الإخوان المسلمين!

طبعاً اعتقلوا.. واعتقلنا أيضاً جميع تنظيمات الإخوان المسلمين القديمة، وقلنا إن العملية مش عملية بسيطة، العملية مش عملية اغتيال جمال عبد الناصر،

اغتيال جمال عبد الناصر.. حيطلع ألف واحد جمال عبد الناصر، ولكن اغتيال الشعب لا يمكن إن احنا نقبله بأى حال من الأحوال، والتدمير، ثم الفاشستية اللى بينادوا بها بأنهم بيحكموا باسم الله، وهم فى هذا لا ينفذون أى شىء ولا يقصدون أى شىء إلا أن يكون فيه حكم فاشستى فعلاً.

وبدأنا نستعرض حالاتهم كلهم.. الناس اللى اشتركوا فى هذه التنظيمات السرية كلهم حيثقدموا للمحاكمة.. الناس الخطرين اللى أفرجنا عنهم سنة ٦٤، وكانوا أساساً يمثلوا رءوس فى الجهاز السرى أو أعضاء خطرین، دول حنعتقلهم، بعد كده الباقیین بيطلعوا، حنفرج عنهم ونديهم فرصة ثانية، بعد كده إذا أى واحد فيهم لعب بديله بنعتقله ومش حنخرجه أبداً من المعتقل، كفاية.. احنا لا نستطيع أن نقامر بمكاسبنا اللى حققناها فى الـ ١٣ سنة اللى فاتت، ولا نستطيع أبداً أن نتهاون فى مصيرنا.. أن نسلم أنفسنا لأعوان الاستعمار والرجعية، مهما كان اسمهم، ولو كان اسمهم إخوان مسلمين.

احنا كلنا نعرف إن الإسلام فى هذا ليس إلا خديعة؛ علشان يضحكوا بها على عقول الناس وينضموا لهم، أما هم لا هم مسلمين ولا هم إخوان.. هم ناس حاقدین.. حاقدین، الحقد يملأ قلوبهم ويملاً نفوسهم، قياداتهم اللى موجودة فى الخارج تعاونوا مع حلف بغداد.. تعاونوا مع الدول الاستعمارية.. تعاونوا مع جميع أعدائنا.. تعاونوا مع الرجعية العربية، وأثبتوا بالدليل الواضح إن حزب الإخوان المسلمين أو حركة الإخوان المسلمين ليست إلا حركة تعمل لحساب الاستعمار وحساب الرجعية؛ يمولها الاستعمار وتمولها الرجعية، ونحن حسب مبادئنا لن نسمح لأعوان الاستعمار ولا أعوان الرجعية أن يكون لهم أى مجال ولا أى نشاط بيننا؛ لأننا بهذا نؤمن مستقبلنا ونؤمن النجاح اللى حصلنا عليه. قاموا هم فى سنة ٥٤ وحاولوا إنهم يضربوا الثورة.. وكانوا بهذا يخدموا مصالح الاستعمار؛ لأن الإنجليز كانوا موجودين، وكنا اتفقنا على الجلاء، وكان مفروض إن الجلاء حيتم فى خلال ٢٠ شهراً، قاموا هم وحاولوا القيام بالاعتقالات، بدأوا بمحاولتهم اغتالي أنا فى إسكندرية، واستطعنا احنا نضربهم

ونقضى عليهم، والشعب فى هذه الأيام كشفهم، والشعب فى هذه الأيام عرفهم ونبذهم.. بعد كده حبيننا نديهم فرصة جديدة، لم يقبلوا أن يأخذوا هذه الفرصة.

زى ما قلت فى السنين الأربعة الللى قبل معركة بورسعيد حاولت كل القوى المعادية للثورة بكل طريقة إنها تضعف الثورة أو تقضى عليها أو تستنزف طاقاتها، ولكنها لم تستطع.. الشعب المصرى لم يتراجع ولم يستسلم، وكانت النتيجة الحتمية لصلابتنا وتصميمنا على أن ننال الحرية الحقيقية الكاملة أن حدث الصدام الدموى، وحدث العدوان وفشل العدوان.. بعد فشل العدوان نقول إن بدأت فعلاً البداية الحقيقية لعصر الحرية الللى كنا نسعى إليه، والللى كان أبأونا بيسعوا إليه والللى كان أجدادنا بيقاتلوا من أجله، بعد فشل العدوان كانت فعلاً البداية للثورة الأصيلة.

لم يبق - أيها الإخوة - على أرض الوطن بانتصاركم فى بورسعيد ظل أو شبح للاحتلال الأجنبى، أو لوجود أجنبى أو لنفوذ أجنبى، خرجوا إلى غير رجعة، وفى نفس الوقت هم خرجوا يوم ٢٣ احنا يوم ٣١ أمنا كل الأموال الفرنسية والإنجليزية، واستعدنا فعلاً المصالح الاقتصادية، الللى كانت منهوبة وكانت مستباحة، وبدأ فعلاً بعد كده العمل؛ من أجل أن يكون الاقتصاد اقتصاد وطنى، بعد كده أممت المصالح الأجنبية الأخرى، غير الإنجليزية والفرنسية، وماكانش معقول بأى حال من الأحوال أن يستمر نص فى المية من السكان فى الحصول على ٥٠% من الدخل القومى، معركة بورسعيد نفسها حددت معايير إعادة توزيع الثروة.. النصر الللى حققناه فى بورسعيد، هو الللى دعم هذه المعركة.

النصف فى المية الذى كان يحصل على أغلبية الثروة كان وقت المعركة هو الجزء الذى لم يتصور، ولم يتحمل القطيعة الكاملة والصدام الحاسم ضد الاستعمار؛ لأنهم أساساً كانوا هم أصدقاء الاستعمار.. كانوا يملكون الوطن ولا يعيشون فيه ولا يعيشون له، وكانوا يملكون الثروة.

طبعاً في نفس الوقت كان المذهل أن الغالبية الساحقة التي تعيش في الوطن وتعيش للوطن ولا تملكه - أنتم.. الشعب اللي ما بيملكش حاجة - هي التي تحملت وطأة الحديد والنار، معركة بورسعيد حددت.. معركة بورسعيد قطعت الناس اللي بيعيشوا في الوطن ويعيشوا له هم الناس اللي يجب، ويحق لهم أن يملكوه، أم النصف في المية اللي كان يسلب ويستغل لا يمكن أن يستمروا في أن يملكو ثروات الوطن.

هكذا - أيها الإخوة - سقط في مصر ضمن ما سقط خلال معركة بورسعيد، عصر الحياة للنص في المية من السكان على حساب الغالبية العظمى الساحقة.. كان ذلك أمل الحرية الحقيقية.. يصنع نفسه بالعزة والكرامة على الأرض المصرية. النصف في المية هم اللي كان عندهم كل شيء.. عندهم العربيات، عندهم البيوت، عندهم العمارات، عندهم الشركات، عندهم الأرض، عندهم المصانع.. عندهم كل حاجة، ولادهم هم اللي بياخدوا كل شيء ويورثوا، أما الواحد من دول بيموت ابنه بيطلع، بيرث ١٠٠ ألف جنيه، ٢٠٠ ألف جنيه، ١٠٠٠ فدان، ٢٠٠٠ فدان، إذا نص في المية بيعيش على ٥٠% من خيرات البلد، وبعدين يقفوا يكلمونا ويقولوا لنا نقاوم الفقر والمرض والجهل! ازاي نقاوم الفقر والمرض والجهل؟! ازاي؟! سمعنا من أول الواحد ما طلع وابتدا يوعى في البلد دي وهو بيسمع مقاومة الفقر والمرض والجهل، مقاومة الفقر والمرض والجهل بايه؟ طالما إن معاكم ٥٠% من ثروة البلد، وطالما إن ما بيهمكوش اللي بيتولدوا بيشتغلوا أو ما بيشتغلوش.. عاطلين أو غير عاطلين.. وكان فيه جيش جرار من العاطلين.. كل اللي بيهمكم إنكم تطلعوا بره في الصيف، كل واحد يروح أوروبا يصيف ويتفصح ويستشفى شهر أو اثنين أو ثلاثة ويعمل سياحة، الفلوس اللي محوشينها موجودة برة في البنوك وفي المصارف وما فيش حاجة أبدا تعصى عليهم، كل الحياة المرفهة لهم، أما الشعب.. الشعب بيعملوا له مصلحة ضمان جماعي تدّي المحتاج منه حسنة.. صدقة.. دا كان مجتمع النصف في المية.

هل احنا اللي طلعتنا وناديننا بالثورة والاستقلال والحرية، كنا نرضى أن نبقى في مجتمع نص في المية؟! نص في المية عايش، و ٩٩,٥% إما مش عايشين أو عايشين على الكفاف.. نص في المية واخذ نص الدخل القومي، وواحد ناتج عمل الباقي، العامل اللي بيعمل ويستحق ٢٥ قرش أو ٣٠ قرش بياخذ ١٢ قرش! الباقي بياخذهم مين؟ الطبقة السائدة الحاكمة، النصف في المية اللي عنده نصف الدخل القومي، أو العامل الزراعي بيجي يشتغل في المواسم بخمس قروش عشر قروش بالأكثر، بقية السنة عاطلين، يبقى بلد إيه؟ بلد النصف في المية، أما الـ ٩٩,٥% مالمش حاجة فيها.. لهم الفقر.. رغم ما يقوله الحكام عن الضمان الجماعي ومقاومة الفقر والمرض والجهل، هل كنا نقبل إن احنا نعيش في مجتمع النصف في المية؟ معناه إيه إن احنا نعيش في مجتمع النصف في المية، يعني ما نصنعش، ما نصلحش أرض، ما نعملش السد العالي، ما هو مجتمع النصف في المية، لو أنا من النصف في المية دول أنا عايز السد العالي ليه؟ أنا عايز السد العالي علشان الناس تطلع تشتغل وتتعلم، طيب أنا النصف في المية المستغل.. أنا عايز الناس تطلع تتعلم علشان يعملوا ثورة على؟! أنا النصف في المية اللي ناهب ثروة البلاد.. أنا ليه يهمني إن الناس تتعلم؟! يهمني الناس ما تتعلمش، يهمني الناس تفضل مغمضة وما تفتحش، النصف في المية اللي بيحكم واللى بيستغل ما يهמוש أبداً الناس تتعلم، ولا يهमे إن الناس تبقى صحتها كويسة، ولا يهमे إن الناس تشتغل، بل بالعكس يهमे إن الناس تكون في بطالة علشان يبجوا يتدللوا له علشان يشتغلوا، كل واحد بيجي ببوس الإيد وببوس الرجل علشان يشتغل شغله بـ ٤ جنيه أو بـ ٣ جنيه.

كلنا عارفين ازاي دا كان بيحصل قبل الثورة، المجتمع اللي بيحكم.. المجتمع اللي بيحصل على نصف الدخل القومي عايز يعمل سد ليه؟ حيعمل أرض لمين؟ للفلاحين؟ ولية الفلاحين ياخدوا أرض ويفتحوا عينيهم؟! حيعمل أرض ليه؟ طيب ما هو عنده الأرض، ما هو مشروع السد العالي دا موجود من سنة ٢٠، ماحدش فكر أبداً ينفذه، يدينا ٢ مليون فدان ويحول لنا ٧٠٠ ألف فدان

حياض. مجتمع حكم الطبقة.. تحالف الرجعي.. تحالف الإقطاع مع رأس المال.. تحالف الرجعية مع الاستعمار.. لا يمكن إنه يقبل دا، والعملية سهلة، يقول لك المجتمع حر.. كل حاجة فيه حرة، الحكومة مالهش دعوة، الناس عايزة تعمل مصانع تعمل مصانع، طيب أنا اللي مش لاقى أكل حاعمل مصانع ازاي؟! اللي مش لاقى ياكل مش حيقدر يعمل مصنع، مين اللي حيقدر يعمل مصنع؟! اللي حيقدر يعمل مصنع هو اللي عنده فلوس، يعنى النصف فى المية برضه، اللي حيروح يجرى يشتغل فى المصنع دا الناس اللي مش لاقيين شغل، طالما إن الناس اللي مش لاقيين شغل عدد كبير؛ إذا بيقلوا بأى أجر يعطى لهم، إذا مين اللي يكسب؟ يكسب الطبقة المستغلة، تحالف الإقطاع مع رأس المال.

يعمل خطة؟! دا هو عايز الناس كلها لا هي لاقية تاكل ولا تتعلم.. يادوبك كل واحد ياخذ أجر يوكلة الضرورى، ولا تتعلم ولا يديها خدمات؛ بحيث إن الكل يبقوا عبيد له والكل يجروا وراه يترجوه، والكل يروحوا له بكروت، ودا عايز يشغل ابنه، ودا عايز يشغل كذا، ودا عايز يعمل كذا.. إلى آخره. العملية سهلة، استثمرت أموال أو ما استثمرتش أموال هم ما يهممش، وزى ما قلنا فى سنة ٥٢ الاستثمار فى الصناعة كان ٢ مليون جنيه.

كلنا نعرف قبل الثورة اللي كان بيطلع من كلية الحقوق كان بيشتغل فين، اللي كانوا بيخرجوا من الجامعة كانوا بيروحوا فين! ما عدا ولاد النصف فى المية ومحاسبيهم اللي بيخدموهم واللى عارفينهم، يروحوا فين؟ هل بيشتغل كان بشهادته الجامعية؟ يقولوا له مافيش محلات، يشتغل شغلة بـ ٧,٥ جنيه لغاية ما يفضى محله إذا فضى محل، ما يهممش، مجتمع النصف فى المية مجتمع الاستغلال، مجتمع الطبقة.

العملية بالنسبة لنا احنا بعد الثورة كانت عملية تبقى سهلة قوى، نعيش فى مجتمع النصف فى المية ولا نعذب نفسنا، ولا نحتاج جهد ولا نقول خطة ولا استثمار ولا ادخار، أبداً.. نريح نفسنا.. نقول لكم احنا مالناش دعوة، حنحككم وبننضم للطبقة، وهم كانوا يرحبوا بنا قوى، ومجتمع هو كويس مجتمع طرى، ومجتمع

كويس ومريح، مش مجتمع شقا وعذاب وغلب! مجتمع سهر ورقص! يعنى الواحد لو عايز يريح نفسه كان بعد الثورة.. يعنى الواحد بعد الثورة لو كان راح انضم لهم كان استريح، ماكانش شاب! (تصفيق) ولكن لو كنا كده ماكانش عملنا ثورة، طيب ما احنا كنا كويسين.. ما أنا كنت كويس.. أنا واحد سألتى فى معسكر الشباب، بيقول لى أنت اشتركت فى الثورة علشان الحافز الشخصى؟! قلت له حافز شخصى ايه؟! دا أنا طلعت يوم ٢٣ يوليو والنسبة الكبيرة إن أنا ماارجعش، احنا كنا عدد قليل قوى، كنا ٩٠ واحد.. ٩٠ واحد، احتمال نرجع البيت أو ما نرجعش، احتمال ما نرجعش أكبر قوى من احتمال نرجع؛ إذا ماكانش وازع شخصى ولا طموح شخصى.. كانت تضحية وكانت ثورة، وواحد طالع علشان يموت مش طالع علشان يكسب، أبدا.. دى المبادئ اللي طلعتنا بها، ودى المبادئ اللي خلقتنا مشينا فى السكة اللي احنا ماشيين فيها لغاية النهارده. لو كنا رُحنا انضمامنا لمجتمع الحفلات والطبقة وسرنا استمرارا لتحالف الإقطاع مع رأس المال، بالنسبة لى أنا كان الموضوع.. بالنسبة لى أنا شخصياً كان الموضوع يبقى أريح، طبعا لو كنا كده ماكانش أبداً فكرنا فى الثورة، كنا مشينا، أنا قبل الثورة كنت ضابط كبير فى الجيش.. عندى عريية.. عندى عيلتى.. وعايش كويس وعندى أولادى، وبالنسبة لى أنا ماكانش ينقصنى حاجات كثير.

إذا العملية من أجل شعب مصر، من أجلكم أنتم.. من أجل الشعب؛ المبادئ الستة اللي أعلنت يوم الثورة، والأعمال اللي اتعملت، ما رضيناش أبداً إن الأمور تجرى كما كانت تجرى، وإن القلة الممتازة تفضل على القمة، وإن حكم الطبقة يفضل، قلنا لا بد أن نهزم حكم الطبقة المستغلة، تحالف الإقطاع مع رأس المال، تحالف الرجعية مع الاستعمار، ونقيم بدلاً من ذلك تحالف قوى الشعب العاملة، العمال.. الفلاحين.. المتقنين.. الجنود.. الرأسمالية الوطنية.. دى الثورة. الكلام الأولانى لا يحتاج إلى تخطيط ولا خطط - حكم الطبقة - ولا تصنيع ولا مصانع، ولا أرض جديدة، ولا سدود ولا كهربا ولا مفاعلات ذرية، ولا الكلام اللي احنا بنعمله النهارده داهوه، على كل شوية انتخابات يوزعوا لهم

قرشين، ويقولوا لكم شوية خطب، وحزب الأغلبية بيأخذ الحكم لغاية الانتخابات الجاية، وهكذا كلنا عارفين ازاي، يفضل الفلاح للفقر والجهل والمرض، ويفضل العامل المصرى نفاية تعتصر الآلة الرأسمالية كل حياة، فيها ثم تتركها لمصيرها.

لكن الشعب المصرى بإرادة الثورة وإرادة الحرية، مش من أيامنا من قبلنا، أبأونا يوم ما كانوا بيقولوا يحيا الاستقلال ويستشهدوا، وأجدادنا، الشعب المصرى، من قبلنا بإرادة الثورة، وإرادة الحرية، أوضح وأثبت وصمم على رفضه المطلق والبات لمجتمع النصف فى المية ولطغيانه ولاستغلاله، الشعب المصرى صمم على أن يبنى مجتمع المية فى المية، البلد تبقى للمية فى المية، ما تبقاش للنصف فى المية، دا كان اختيار الشعب المصرى المجيد، ولكنه - أيها الإخوة - كان أيضاً اختيار الشعب المصرى الصعب.

سهل قوى إن أنا أعيش نصف فى المية، وأديهم مستوى كويس فى المعيشة، وأخلى الـ ٩٩,٥% يخدموهم، صعب قوى إن أنا أعيش الـ ١٠٠%، بنعوز عمل وجهد، ولكنه اختيار مجيد، وفى نفس الوقت اختيار صعب ماكانش طبعاً هذا الاختيار الصعب داخل الحدود بس، كان داخل الحدود وخارج الحدود. الشعب المصرى خرج إلى عصر ما بعد السويس بخطوط رئيسية: الحياة لكل والمستقبل لهم.. الحياة لكل؛ لكل الشعب، المستقبل لكل الشعب، مش الحياة للطبقة الرأسمالية الإقطاعية، والمستقبل لها والفقر للشعب والإهمال للشعب.

خرج أيضاً الشعب المصرى بعد بورسعيد لأنه لأمة العربية ومن الأمة العربية، وخرج أيضاً لأنه للحرية فى كل مكان، الشعب المصرى، الذى نادى بالحرية.. أنه للحرية فى كل مكان؛ ومع الحرية فى كل مكان، وأيضاً إنه للسلام على كل أرض، ومن أجل السلام.

كل دى مبادئ مترابطة.. منطلق هذه المبادئ جميعاً رفض منطق مجتمع النصف فى المية اللى كنا عايشين فيه قبل الثورة، مجتمع النصف فى المية بيجد

الراحة داخل حدوده وفي العزلة، وحصل كنا منعزلين ومالناش دعوة بالأمّة العربية ولا بالشعب العربي، بعد أن صممنا على أن نكون مجتمع الـ ١٠٠%، أعلننا بصراحة أننا للأمة العربية كلها، وأنا من الأمة العربية وجزء من الأمة العربية.

مجتمع النصف في المية، حكم الطبقة المستغلة.. حكم تحالف الإقطاع مع رأس المال يجد الحماية دائماً من قوى الاستعمار، يتحالف مع الاستعمار سراً أو علناً، عندنا أمثلة في المنطقة بتاعتنا كثير.. يتحالف مع الاستعمار، ويحقق للاستعمار مصالحه، والاستعمار يحميه.

مجتمع النصف في المية ما يهتموش السلام؛ لأنه بيقدر يضاعف ثرواته في وقت الحروب، ياخذ الغنيمة أو ياخذ لقمة من الغنيمة؛ زى ما عملوا هنا في وقت الحرب العالمية الثانية، احنا مجتمع الـ ١٠٠%، بنقول إن النضال الوطني الأصيل؛ ثورتنا.. نضالنا الوطني.. الحرية التي نسعى إليها.. كل هذا لا يمكن لنضالنا الوطني أن يصاب بازدواج الشخصية، أوضاع الوطن في الداخل هي التي تحرك الوطن في الخارج، نبص في الأول، قبل الثورة بره كانت قيمتنا إيه عالمياً؟ ماكانتلاش قيمة عالمية أبداً، ماحدث يدينا قيمة.. عارفين إن الإنجليز هم اللي بيحكموا، بعد الثورة ابتدت تبقى لنا قيمة عالمية، ليه؟ لأن احنا بقينا أحرار في الداخل، وعندنا حرية في الداخل؛ إذاً كل العالم يحترمنا.

طبعاً وأنا باقول النصف في المية، النصف في المية بيساوى ١%.. يساوى ٣%.. يساوى ٥% لأن ممكن طبعا الطبقة تكبر، ناس تدخل ضمن الطبقة.. تدخل ضمن الطبقة والطبقة تبقى ٥%، يبقى ٥% عايشين.. ٥% لهم كل الخير.. ٥% لهم كل الثروة أو لهم نصف الدخل القومي أو أكثر، و٩٥% مالهمش، ٥% بيتحكموا.. ٥% يمثلوا الطبقة، تحالف الاستعمار مع الرجعية، يمثلوا الطبقة، تحالف الإقطاع مع رأس المال، وحوالينا بلاد كثيرة بتحكم بهذا الأسلوب وأراحت نفسها بالعزلة وحمّت الطبقة المستغلة.. حمّت الرجعية نفسها بالتواطؤ مع الاستعمار، استفادت الرجعية.. استفادت الطبقة المستغلة النصف في

المية أو الـ ٥% من الأحراف الظاهرة، ومن الأحراف الخفية، وأصبحت هذه البلاد قواعد لهجمات الاستعمار العسكرية أو السياسية أو الاقتصادية أو الدعائية ضد الناس التي ترفع رءوسها في مواجهة الاستعمار.. احنا لا نقبل مجتمع النصف في المية مجتمع الطبقة ولا مجتمع الـ ٥%؛ لأن هذا المجتمع في البلاد اللي هو عايش فيها.. البلاد اللي فيها حكم هذا المجتمع مشاكلها كلها مدفونة مع مصالح جماهيرها، والجماهير تضغط من فوقها عناصر الطبقة المسيطرة والطبقة المستغلة، حكم النصف في المية.. حكم الطبقة.. حكم تحالف رأس المال مع الإقطاع لا يواجه مشاكل التنمية مثلاً، لمن التنمية، ليه التنمية؟ التنمية اللي بنتكلم عليها في بلدنا ليه؟ التنمية للمستقبل، طبعا حكم الطبقة يريد أن يحصل على كل ما يستطيع الوصول إليه، كلنا بنفتكر حكم الوزارات عندنا في الماضي. كل وزارة بنتيجي سنة، ٦ اشهر، سنتين، عايزة في السنة أو السنتين تاخذ أكبر ما تقدر تعمل؛ الأنفار والناس عايزين شوية مصارف.. عايزين شوية ترع.. عايزين شوية طرق، بتتعمل العملية دي في السنة والسنتين خدمات للطبقة الحاكمة والطبقة المستغلة، وطبعا إذا كان فيه حديث عن التنمية أو حديث عن الضمان الاجتماعي فكل دا يكون ستار الاستغلال، التنمية تكون ستار الاستغلال، تطرح المشاريع لتكون وسيلة لزيادة تكديس الثروات، ولزيادة تراكم الأرصدة المهربة إلى الخارج.

البلاد - زى ما كنا قبل الثورة - اللي بيحكمها النصف في المية، أو اللي فيها حكم الطبقة؛ النصف في المية أو ٥%، لا تواجه مشاكل التخطيط، لمن التخطيط؟ أقرب السبل إلى تحقيق أكبر قدر من الاستغلال لا يحتاج إلى تخطيط، لا يفكر في الصناعة الثقيلة، لا يفكر في السدود ولا يفكر في الكهرباء، إيه اللي يغريه انه يعمل مشروع - زى ما قلنا - زى مشروع السد العالي؟ بنصرف في مشروع السد العالي ٤٠٠ مليون جنيه، لسه ما أخذناش فوايد من ٤٠٠ مليون، حتيجي الفوايد بعد كده، بل بالعكس صرف ٤٠٠ مليون جنيه بيعمل لنا مشاكل؛ لأنه بينزل في السوق ٤٠٠ مليون جنيه، لا يواجه مشاكل الاستهلاك، حكم

النصف في المية.. لمن الاستهلاك؟ مين حيتهلك؟ حيتهلكوا إيه؟ إذا كانت الناس ما بتشتغلش حيتهلك إيه؟ إذا كانت الناس عاطلة حيتهلك إيه؟ إذا كان العامل بيشتغل بـ ١٢ قرش حيتهلك إيه؟ وإذا كان الفلاح بيشتغل بـ ١٠ قروش أو بـ ٨ قروش حيتهلك إيه؟ في المواسم! مين اللي بيستهلك؟ النصف في المية والناس المقربين منهم، بيحصلوا على كل طلباتهم بسهولة، سهل قوى.. كل طلباتهم بتيجي من الخارج مستوردة، كل الطلبات بتيجي من الخارج مستوردة، النصف في المية هم اللي بيستهلكوا الاستهلاك الحقيقي، هم اللي عندهم الثروة.. عندهم نصف الدخل القومي، بقية الناس ٩٩,٥% عندهم نصف الدخل القومي الثاني، وحيزودوا الدخل القومي ليه؟! أما قامت الثورة كان الدخل القومي ٨٠٠ مليون جنيه، النصف في المية بيأخذوا ٤٠٠ والـ ٩٩,٥% بياخذوا ٤٠٠، النصف في المية عندهم ٤٠٠ مليون جنيه يشترتوا منها استهلاكهم، والـ ٩٩,٥% عندهم ٤٠٠ مليون جنيه، بأدوبك كل واحد يقدر يكفى نفسه أو ما يلاقيش ياكل.

مجتمع الـ ١٠٠% بيختلف، النهارده الدخل القومي بدل ما كان ٨٠٠ مليون جنيه، في السعر الثابت لـ ٥٩ (١٧٦٢) مليون جنيه، لكن لمين؟ النصف في المية؟! لأ، للـ ١٠٠%، للشعب كله، مافيش النصف في المية، مافيش الطبقة المستغلة اللي كانت تملك الثروات، وتملك المصانع وتملك الأرض.. إلى آخر كل شيء، وتملك كل شيء، مجتمع النصف في المية لا يواجه مشاكل الاستهلاك، ولا يواجه مشاكل الادخار.. الادخار في مفهومه هو الادخار الشخصي في البنوك الأجنبية؛ في الحسابات السرية في سويسرا، هو دا الادخار، لكن مش ضرورى أبداً يكون ادخار علشان الاستثمار، ولا يواجه مشاكل زيادة السكان. إذا أراد السكان انهم يزيدوا.. يزيدوا زي ما هم عايزين، وياكلوا.. إذا نقوا أكل ياكلوه، وإذا ما لقوش ياكلوا الجوع، ياكلوا أى حاجة.. ولا العيش والبصل! دا المجتمع.. مجتمع طبقة.. مجتمع تحالف الإقطاع مع

رأس المال، إذا ما لقوش أى حاجة.. إذا ما لقوش العيش والبصل يتفلقوا.. دى فلسفة تحالف الإقطاع مع رأس المال.

الشعب المصرى بالثورة رفض هذا كله.. الشعب المصرى بالثورة.. بثورة ٢٣ يوليو سنة ٥٢، وبالثورة المستمرة، رفض هذا المجتمع كله.. هدم هذا المجتمع كله، وصمم على أن يقيم مجتمع تحالف قوى الشعب العاملة، مجتمع الـ ١٠٠%.. مجتمع الشعب كله، رفض منطق مجتمع النصف فى المية، واختار الشعب المصرى طريق الحرية، ولكنه فى نفس الوقت اختار الطريق الصعب. سهل قوى إن أنا أوفر مبلغ من المال النصف فى المية، يعنى أما أقول الـ ٤٠٠ مليون جنيه بيروحوا النصف فى المية سهل توزيعهم، لكن تعال بقى إذا كنت عايز تدي نفس النصيب للـ ٩٩,٥% تبقى عايز كام؟ تبقى عايز ٤٠٠ مليون، مش فى ٩٩% فى ٢، العملية كبيرة خالص يعنى إذا كنا عايزين نعيش بالطريقة اللى كانوا عايشين بها؛ إذا الشعب المصرى اختار الطريق الصعب، ولكن اختار الطريق، الذى يحقق للشعب كله الحرية والكرامة.

فى عصر ما بعد السويس، بعد بورسعيد الشعب المصرى وضع خطين، الخطين دول حكماً مسيرته إلى الآن فى عمله الداخلى: الكفاية والعدل، الكفاية يعنى الإنتاج، نفضل نتج لغاية كل ما واحد فينا ياخذ كفايته، والعدل يعنى عدالة التوزيع وإذابة الفوارق بين الطبقات، الكفاية والعدل، وهل نقدر نعمل دا فى يوم وليلة؟ طيب نعمله ازاي فى يوم وليلة؟ كنا عشرين مليون يوم الثورة.. الحمد لله النهارده بقيتم ٣٠ مليون، طيب عايزين كفاية، حققنا العدل وزعنا.. عملنا على إذابة الفوارق بين الطبقات، عايزين الكفاية بقى، وأما نحقق الكفاية بنقول إن احنا حققنا الاشتراكية. النهارده واحد ادانى جواب، وبيقول إن أنا عايز مسكن، وإلا ازاي نبقى فى عهد اشتراكية؟ أنا باقول له لسه يا ابني ما بقيناش فى عهد اشتراكية، لسه، يوم فعلاً ما نقدر ندى كل واحد مسكن جديد ومسكن مريح، نقول إن احنا فى عهد اشتراكية.. أما النهارده احنا فى مرحلة انتقال من الرأسمالية إلى الاشتراكية.. بنبنى.. بننتقل علشان نقيم مجتمع الرفاهية، ودالنا

نحققه إلا بالعمل، ما عنديش أنا بير فى البيت بانزل فيه جردل وأطلع ذهب  
 علشان أدى الدكتور عبد المنعم القيسونى أو زكريا محيى الدين.. أبدأ، زكريا  
 محيى الدين، ما عندوش حاجة، عنده كم فدان مستعدين ناخذهم منه (ضحك)  
 ما عندوش.. يظهر بأعْهُم.. بيقول ما عندوش (ضحك) ما عندوش الراجل  
 حاجة.. ما عندوش غير شجرتين مانجو فى البيت.

مافيش.. حنجيب منين؟ أنت عايز بيت، حاجيب لك منين أنا البيت اللى  
 يتكلف ألف أو ألفين جنيه؟ أنا وأنت وهو وكل واحد فينا مع بعض نتكاتف  
 ونبنى، ندخر ونعمل، دى الكفاية، لكن ياريت أنا النهارده أقدر أدوس على زرار  
 باطلع لكل واحد فيكم شقة ولكل واحد بيت، مافيش زراير.. أو أدوس على  
 زرار اطلع لكل واحد تليفزيون وعربية، مافيش، ربنا قادر على كل شىء.. ربنا  
 قال لنا اجتهدوا، بالاجتهاد والعمل بناخد قُصَاد كده، ربنا كان قادر يَدَى كل واحد  
 فينا، وكل واحد من الناس، كل شىء، وكل متع الدنيا، ولكنه له حكمة.. حكمة  
 الحياة إن احنا نكافح ونعمل علشان نحقق آمالنا، وإلا كانت الحياة تبقى حياة  
 ما فيهاش متعة، ما فيهاش كفاح.. ما فيهاش معنى. احنا قضينا على حكم  
 الطبقة، وأمنا حكم الشعب؛ حكم الـ ١٠٠%؛ تحالف قوى الشعب العاملة، أدبنا  
 الفوارق بين الطبقات، عملنا وأمنا، وسرنا خطوات كثيرة، أمنا البنوك وأمنا  
 شركات التأمين، وأمنا الصناعة والتجارة الخارجية والنقل.. كل الحاجات اللى  
 أنتم عارفينها دى، وقلناها بيجى ١٠٠ مرة، طيب وبعد كده؟ طيب دا العدل؛ إذا  
 الخطوة الثانية هى الكفاية، لا تستطيع الاشتراكية أو المبادئ الاشتراكية اللى  
 احنا بننادى بيها إنها تغير فى يوم وليلة نتائج مجتمع الاستغلال.. نتائج حكم  
 الطبقة، تحالف الإقطاع مع رأس المال، أبدأ، لكن نستطيع بالعمل المستمر إن  
 احنا نحقق هذا. قلنا علشان الكفاية نعمل إيه؟ بعد بورسعيد من سنة ٥٧ عملنا  
 خطة صناعية اتكلفت ٣٠٠ مليون جنيه، بدأت سنة ٥٧ وانتهت سنة ٦٠، فى  
 الوقت اللى بدأت فيه الخطة الخمسية الأولى.. الخطة الخمسية الأولى وجهنا

١٥١٣ مليون جنيه للاستثمارات.. كفاية؟ هل الـ ١٥٠٠ مليون جنيه دول..  
حيعملوا لنا ايه؟

إذا في الخمس سنين حنعمل حاجة معينة، طيب لو ما صرفتش الـ ١٥٠٠ مليون جنيه دول كان يحصل ايه؟ نصفكم كانوا يبّقوا عاطلين.. ما تشتغلوش، ولا أولادكم بيشتغلوا، ولا اللي بيتخرج من الجامعة بيلاقى شغل ولا حاجة، ما هو النهارده الناس بتشتغل ليه؟! فيه مصنع بتشتغل، اللي بيتخرج من الجامعة بيشتغل، فيه إصلاح أراضى بيشتغل.. الفلاح بيشتغل واللى بيتخرج من الجامعة بيشتغل، فيه طرق بتشتغل.. فيه كهربا بتشتغل.. فيه سدود بتشتغل.. فيه بناء مساكن بتشتغل.. طيب السدود والصناعة والخدمات والطرق والكلام دا حاعملها مجاناً واللا أعملها بفلوس؟ حاعملها بفلوس.

في الـ ٥ سنين اللي فاتت صرفنا ١٥١٣ مليون جنيه، وقلنا في العدل عملنا الخطوات، الشعب سيطر على وسائل الإنتاج، العامل شريك في الإدارة والربح، ٧ ساعات في اليوم، إجازات والتأمينات والعمالة.. التعليم الابتدائي كان عندنا مليون النهارده عندنا ٤ مليون، وسنة ٥٣/٥٢ اتصرف على التعليم ٢٧ مليون جنيه، سنة ٦٥/٦٤ من ٢٧ مليون جنيه وصلنا إلى ٨٦ مليون جنيه، ٨٦، كان عندنا في الابتدائي مليون طالب عندنا ٤ مليون، عايزين سنة ٧٠ كل ولد في البلد يكون له محل في الابتدائي.. الجامعة.. كل واحد بيدخل الجامعة، المعاهد العليا كل واحد بيدخل المعاهد العليا، مفتوحة للشعب مش للطبقة، بالمجموع، مالناش دعوة مين أبوه واللامين أهله واللامين عيلته، مافيش، مش موضوعنا، التعليم مجاناً.. الجامعة مجاناً. في المعاشات، طول عمرنا الحكومة بتخصم كانت ربع المعاش.. الحكومة تنازلت، مافيش حاجة ما اتعملتش، تأمين، عمالة، اللي بيتخرجوا من الجامعة كل سنة بيتعينوا، اللي بيتخرجوا من المعاهد الصناعية بيتعينوا.. اللي بيتخرجوا من المعاهد العليا بيتعينوا.. اللي بيتخرجوا من الثانوية الزراعية بيتعينوا، كل واحد بيشتغل، دا بالنسبة للعدل وبالنسبة للكفاية. بالنسبة للعمل السياسي.. توسيع السلطة السياسية لضمان الاستقرار،

سلطة الفلاحين والعمال بالنص في كل المجالس الشعبية وفي مجلس الأمة، الاتحاد الاشتراكي كتتنظيم لقوى الشعب العاملة.

مشينا من سنة ٦٠ لسنة ٦٥، أول خطة سميهاها سنوات التحول العظيم، انتهت الخطة الأولى، والآن ابتدينا في الخطة الثانية، واجهتنا مشاكل.. إيه المشاكل دي؟ هل هذه المشاكل هي مشاكل النجاح أو مشاكل الفشل؟ نبحث.. طبعاً اختيارنا الصعب للحرية كان هو السبب، لو فضلنا والله مجتمع النصف في المية ماكانتش تقابلنا المشاكل دي، اللي بياكلوا سكر ماكانوش بياكلوا سكر، اللي بيشر ب عشر فناجيل شاي يادوبك كان ياخذ له كباية شاي قَدْ كَدَه؛ لأن مافيش.. ما بيشتغلش، طبعاً هذا الطريق الصعب إذا ماكانش اخترناه كنا ضيعنا الحرية اللي نادينا بها، واللى قامت الثورة من أجلها، واللى استشهد من أجلها أبائنا وأجدادنا، وضيعنا الحياة وضيعنا المستقبل، وفضل الشعب في مجتمع النصف في المية.

في الخمس سنين اللي فاتوا عملنا إيه؟ استثمرنا ١٥١٣ مليون جنيه، يعنى إيه استثمرنا؟ يعنى شغلنا، بنينا مصانع وصلحنا أرض، وبنينا طرق وسكة حديد، وخطوط أتوبيس وكبارى.. إلى آخر كل هذه العمليات، وبنينا مساكن، مجموع الفلوس اللي اندفعت في العمليات دي ١٥١٣ مليون جنيه، طيب أنا حاجيب الـ ١٥١٣ مليون جنيه منين؟ أنا لا عندي حاجة ولا زكريا محيي الدين عنده حاجة، ما عنديناش! الشعب اللي قال إنه شعب الـ ١٠٠% هو اللي عليه يعمل وعليه بينى.. عليه يعمل وعليه بينى، زدنا الخدمات، باقول عملنا إيه في الإسكان؟ العشر سنين اللي قبل الثورة في الإسكان صرفوا ١٨ مليون جنيه، من أول الثورة حتى سنة ٦٠ اتصرف ٣٦٢ مليون جنيه للإسكان.. من ١٨ لـ ٣٦٢، من أول الثورة لسنة ٦٥ اتصرف ٥٢٤ مليون جنيه للإسكان، الحكومة صرفت، التعليم قلت لكم عليه.. الصحة: سنة ٥٣ كانت ميزانية الصحة ٦ مليون جنيه، سنة ٦٤/٦٥ (٢٢,٥) مليون جنيه العمالة سنة ٥٢ كان عندنا

٤,٥ مليون عامل، سنة ٦٥/٦٤ (٧,٣٣٣,٠٠٠) عامل، يعنى تقريباً ٧,٥ مليون اشتغلوا، على الـ ٤,٥ مليون عامل ٣ مليون عامل.. ٣ مليون.

فى مجتمع النصف فى المية مجتمع حكم الطبقة ماكانش ولا حد ولا نصف مليون، حيينوا مصانع ليه وحيينوا سدود ليه وحيينوا طرق ليه، وحيعملوا الكلام دا ليه؟! مافيش داعى أبداً!

التعليم مجاناً، الأجور ارتفعت.. الأجور.. سنة ٥٢ مجموع الأجور كان ٣٥٠ مليون جنيه وصل ٦٥/٦٤ إلى ٨٨٠ مليون جنيه، الأجور اللى كانت بتتاخذ سنة ٥٣/٥٢ كانت ٣٥٠ مليون جنيه، وصلت السنة اللى فاتت اللى احنا فيها دى إلى ٨٨٠ مليون جنيه، فى مجتمع النصف فى المية، مجتمع حكم الطبقة يدوا أجور ليه؟ يرفع الأجور ويجعل الحد الأدنى ٢٥ قرش ليه؟ يعمل سبع ساعات ليه؟ يعمل سدود ليه؟ ما يعملش، مافيش أجور، يصلح أرض ليه؟ طبعاً النتيجة لدا كله إن زاد الاستهلاك؛ لأن الأجور.. أما بنقول أجور.. وبعدين أما أقول الأجور لازم افتر حاجة تانية كمان، الأرض اللى اتوزعت على الفلاحين؛ المليون فدان دى كان ضمن إيراد الطبقة المستغلة، النهارده دى تعتبر كأجور عائد من الملكية، وبيتصرف مش محسوب غير الإصلاح الزراعى، وغير التمليك، وغير الحاجات دى، دى الأجور اللى بتؤخذ نقداً، أما بنضيف عليها المليون فدان بتوع الإصلاح الزراعى، اللى اتوزعوا بيطلع حوالى ٥٠ مليون جنيه أو أكثر.. دا النهارده الفلوس بتتوزع فى البلد على هذه القاعدة الكبيرة.

طبعاً عندنا مشاكل قابلتنا، زيادة السكان من ٢١ مليون وصلنا إلى ٣٠ مليون، وطبعاً أنا ما أقدرش أمنع زيادة السكان بقانون، ولكن إذا ماكانش استثمارنا وزودنا الإنتاج مع زيادة السكان، كان الحال يكون أسوأ، فيه مشاكل يمكن نقول فيه تعقيدات بيروقراطية، وفيه تعقيدات فى بعض الشركات، لكن كل دى مشاكل تتحل، أهم شىء إن احنا عملنا.. اشتغلنا بالعمل، وعملنا كمجتمع الـ ١٠٠% وليس كمجتمع النصف فى المية، وأنتجنا للـ ١٠٠% مش النصف

فى المية، واستهلكنا للـ ١٠٠% مش النصف فى المية، واتعلمنا الـ ١٠٠% مش النصف فى المية.

### أيها الإخوة:

ما ظهر أمامنا من نتيجة نجاح الخطة الخمسية الأولى هو الدافع الأول والوحيد إلى عمليات المراجعة، التى نقوم بها الآن لضمان نجاح الخطة الثانية، الخطة الأولى استثمرنا ١٥١٣ مليون جنيه، وحصل الاستهلاك، وزادت الفلوس فى البلد.. طبعًا زادت الفلوس وما فيش إنتاج خالص، باقول لك بأصرف فى السد العالى ٤٠٠ مليون جنيه، ولسه أنا ما أخذت ناتج السد العالى، لسه سنة ٧٠/٦٩ حاخذ ناتج السد العالى، نصرف فى مصانع، ومصنع بيتأخر ٣ سنين أو أربع سنين لغاية ما يدينى الناتج بتاعه، قابلتنا مشاكل النهارده.. هل نتوقف؟ ما هو إذا توقفنا بنرجع تانى إلى سبيل من السبل الآتية؛ ماحدش يشتغل لا أخوك ولا ابنك ولا حاجة، لأن حاشغله منين؟ حادف له ماهيته منين؟ ماهياش تكيّة، بيبجى واحد يشتغل ياخذ ماهية، حاشغله فين إلا أشغله فى مصنع، أو فى سد، أو فى طريق، أو فى بناء، أو فى تجارة إلى آخر هذا الكلام؟ اللى بيطلع من الجامعة ما اشغلهوش، اللى بيطلع عايز يشتغل عامل، متأسف ما فيش شغل.. إذا توقفنا يعنى، بارجع تانى زى المجتمع القديم، بعدين طيب حادف العلاوات منين إذا كان ما فيش شغل؟ إذا نجمد العلاوات زى ما كانوا بيعملوا زمان، هل بس نقتصر على تجميد العلاوات، لأ، نوفر.. نوفر فى اللى بيشتغلوا لأن حاجيب لهم ماهيتهم منين؟ إذا لا يمكن إن احنا نتوقف؛ لأن إذا توقفنا نبقى رجعنا للمجتمع القديم وانتهى كل شىء، لازم نستمر فى طريق الحرية، لا نستطيع أن نفشل، دا أيضًا اختيار صعب.

الخطة الأولى خدت ١٥١٣ مليون جنيه، الخطة الثانية - اللى مبتدية السنة دى - عايزة ما يقرب من ٣ آلاف مليون جنيه علشان نضاعف الدخل فى عشر سنوات، علشان سنة ٧٠ نكون ضاعفنا الدخل عن سنة ٦٠/٥٩، الدخل كان

سنة ٥٩/٦٠ (١٢٨٥ مليون) جنيه، عايزينه سنة ٧٠ الضعف، علشان نشغل الناس، ونؤكل الناس، ونرفع مستوى المعيشة.. إلى آخر الكلام اللي احنا بنقول، يا إما كده مافيش حاجة، احنا عندنا موارد ايه؟ مواردنا ايه فى بلدنا؟ البترول بناخذ منه ايه؟ أولاً: الـ ٦ مليون فدان، وأقل من ٦ مليون فدان واحنا صلحنا نصف مليون جديد، قنال السويس، والبترول يدنا حاجة بسيطة، وشوية المناجم والصحرا بتاعتنا لسه ما اكتشفناش فيها، يمكن بعد سنين نلاقى بترول ونلاقى ونلاقى، لكن دى مواردنا، طيب حنعيش ازاي؟ بنعيش بعملنا، بنوفر وبنبني ونعيش، ونوفر وبنبني ونشغل أولادنا ونشغل اخوتنا، ولكن يبجي واحد يقول لك احبيني النهارده وموتنى بكره! واحد باعت لى جواب بعد الإجراءات الأخيرة، وبيقول لى احبيني النهارده وموتنى بكره! أهوه! طيب وأنا باشغلك أنت وحدك بس! طيب وانت اشتغلت طيب ومستعد ارفدك، ارفدك وما ليش دعوة بك، احيا أنت بقى لوحدك.. أنا ماليش دعوة بك ما باشغلكش. ما نقدرش أبداً نفكر..

يبجي واحد.. تفكير ضعيف جداً، احنا بنفكر فى المجتمع - مجتمع الـ ١٠٠% - لو كل واحد بيقول لك نفسى.. اللي النهارده اشتغل، ما يهموش بقى اللي حيطلعوا من الجامعة السنة دى يشتغلوا واللا لأ، متخرج من الجامعة السنة دى ٢٥ ألف، مين حبشغلهم؟ الحكومة والقطاع العام والحاجات اللي من دى، بنوقف ما بيشتغلوش، لا دا ولا دا، المشاريع الجديدة هي اللي حبشغلهم. واحد ببيعت لى جواب، ويقول لى إن الجيل دا ضحى، ليه الجيل دا يضحى بكل حاجة؟ ماكتبش اسمه، أنا باقول له أنا مش شايف إن احنا يعنى ضحينا قوى، أنا باقول إن الجيل اللي فات هو اللي ضحى، الجيل اللي كان قاعد تحت حكم النصف فى المية، هو اللي ضحى وجاع وقاسى، ومات من الجوع، فين يعنى ضحينا فعلاً.. ضحينا فى معارك سياسية من أجل حريتنا، لكن ما قلناش أبداً اربطوا الأحزمة، وبنعمل كذا وبنعمل كذا، بالعكس دا احنا ابتدينا بإنتاج البضائع الاستهلاكية، ما ابتديناش بالصناعة الثقيلة، ابتدينا بالبضائع الاستهلاكية علشان ندى السوق البضائع الاستهلاكية؛ علشان ندى سلع استهلاكية فى السوق، فين

هى التضحية دى؟ التضحية إيه أما الأجور زادت من ٣٥٠ مليون إلى ٨٨٠ مليون؟ العمالة زادت من ٤,٥ مليون إلى ٧,٥ مليون؟

إذا يعنى تفكير أنصاف المتفقين بيبقى تفكير أهوج، فى هذا استنطاع كامل!! مش ممكن، احنا إذا كنا عايزين نشتغل لسه علينا نعمل.. وعلينا نعمل ونعمل، ما عندناش بترول، لسه ما عندناش موارد، حنور على البترول وحنور على المناجم، وحنصلح ٣ مليون فدان، ونزرع أرض، ونعمل سد، ونطلع ١٠ مليون كيلو وات/ساعة كهربيا، ونعمل محطات كهربيا، ونبنى بلدنا، هو دا السبيل الوحيد، والفلوس اللي بنوفرها بنبنى بها مصانع، وبنصلح بها أرض، بيبجى واحد بيبعت لى جواب وبيقول لى إيه، قوت الشعب يا ريس ليه بتصدّره؟ امنعوا التصدير! احنا أولئى.. ما نصدرش! دا كلام؟ طيب إذا كنت ما أصدّرش مستنى العالم ييقشش على! أى حاجة باجيبها من بره بادفع فيها فلوس، طيب أنا باجيب الفلوس دى منين؟ ما هى من تصدير القطن والرز، وشوية برتقال وشوية خضار وشوية طماطم، وقنال السويس، وشوية بترول وشوية منسوجات، ولكن بقى إيه باجيب لكم؟ بنستورد لحمه من الأرجنتين ومن أورجواى ومن الصين ومن أستراليا، ومن الصومال ومن السودان، حنستوردها مجانا واللا حن دفع فيها فلوس؟ حاجيب لحمه حادفع فلوس؛ إذا علشان أدفع فلوس لازم أصدّر، بعدين نجيب مصانع، مافيش حد بيقشش مصانع لسه، أما باجيب مصنع باشترية، بادفع فلوسه، برضه باقول لكم أنا وزكريا محيى الدين ما عندناش فلوس، كنا ما عندناش حاجة يعنى.. الحمد لله.

طيب حنجيب الفلوس دى منين؟ أما بنقول عايزين الخطة الجاية نحط ما يقرب من ٣ آلاف مليون جنيه، حاجيبها منين، حاخذ قروض من بره، خدت فى الخطة اللي فاتت ٤٠٠ مليون جنيه قروض، باخذ فى الخطة الجاية ٤٠٠ مليون جنيه قروض بس، بيفضل ٢٢٠٠-٢٣٠٠ يبقى لازم أدفعهم، حادفعهم منين؟ من الادخار، أنا عندى لا فى الحكومة، ولا فى البيت، ولا هنا ولا هنا مافيش، بندخر، أنت وأنت.. القرش على القرش، ودا ودا ودا؛ بابنى لكم مصانع

وإبنى لكم بلاد، وأقول لكم آدى مصانع لأولادكم، وآدى أرض زراعية اشتغلوا فيها وتآكلوا منها وبتاع.

بهذا نقدر نبنى بلدنا، اللى بعث لى يقول ما تصدّرش، طيب ما أنا ما أصدرش يعنى ما استوردش، احنا مصانعنا بنستورد لها مواد خام وسلع وسيطة بـ ١٤١ مليون جنيه؛ علشان مصانعنا تدور، لو ما دفعناش الـ ١٤١ مليون جنيه نص مصانعنا تقف أو أكثر، طيب إذا لازم أصدر قطن، لازم أصدر رز، دا السنة دى كنا عايزين نصدر رز ٤٥٠ أو ٥٠٠ ألف طن، مش باين! يا دويك حنقدر نصدر ٢٥٠ ألف طن، والباقى حيتاكل، طيب ما بنصدرش ما نجيبش، القروض اللى بناخذها لازم ندفعها.. القروض لازم ندفعها.. المصنع لازم ندفع ثمنه؛ إذا لازم إذا كنا عايزين نبنى بلدنا نزيد صادراتنا ونقلل استهلاكنا، دا اختيار صعب، ولكن طالما قررنا إن احنا نكون مجتمع الـ ١٠٠% مجتمع الشعب العامل كله لازم نسير فى هذا الطريق، ما قدامناش طريق غيره، لا نستطيع أن نتوقف، ولا نستطيع أن نفشل، وأنا كنت أتوقع ذلك وقلت ذلك صراحة، ووجدت من الضروري أن أضع صورة النضال المقبل أمام الناس، فى أول مرة بعدما قبلت الترشيح من مجلس الأمة، ذهبت إلى الناس يوم ٨ مارس فى أسبوط، وقلت بالحرف:

أيها الإخوة.. لست أَرْضى لنفسى ولا لكم أن أقف لأقول لكم أعطونى أصواتكم، وسوف أصنع كذا وكذا وكذا، ثم أسرد على مسمع منكم الأحلام والمنى، لقد حرصت على أن أقف أمامكم لأقول لكم بكل أمانة وإخلاص إننى لا أملك ولا أقدر أن أحقق لكم عالم الأحلام والمنى، إننى أجيء إليكم وليس معى وعود براءة، وإنما أجيء لكم ومعى خطط عمل مضمّنة، وليس فى جيبى هدايا مغرية أعرضها عليكم؛ وإنما ما أعرضه عليكم هو مسئولية ضخمة وشاقة، أريد أن أضعها على أكتافكم، لم أجيء لأعطيكم وإنما جئت لأطلب منكم، دا قلته يوم ٨ مارس.

## أيها الإخوة:

في كل شيء، المرحلة الجديدة تتطلب عمل، وعمل جاد وعمل صعب، إذا كنا فعلاً عابزين نخلق مصر اللي فيها المواطن العزيز.. المواطن الشريف، لازم نعمل، خصوصاً إن زيادة السكان عندنا يعنى فى سنة ٨٠ حنضاعف، سنة ٧٠ حنبقى ٣٥ مليون، حنوكّل الناس دى منين؟! احنا دلوقت قدامنا المياه اللي حتنجى لنا من النيل.. من السد العالى، كل المياه تدينا ٢ مليون فدان أو ٢,٥ مليون فدان، وبعد كده ما فيش، بنستورد قمح، بنستورد ذرة، القمح سنة ٥٢ كنا بنستهلك مليون و ٦٠٠ ألف طن، السنة دى ٣ مليون و ٦٠٠ ألف طن، بنستورد أكثر من مليون ونص طن، السنة دى بنستورد قمح و ذرة حبوب بـ ١٢٠ مليون جنيه، الراجل اللي باعت لى جواب بيقول لى ما تُصدّرْش، طب حاجيب ١٢٠ مليون جنيه منين؟! إذا كنت باجيب لك القمح و باجيب لك الذرة، و باجيب لك اللحم من الخارج، وحتى جيبننا الفراخ من بره مجمدة، لازم أدفع الـ ١٢٠ مليون جنيه، وإلا تصبحوا ما تلاقوش عيش فى البلد.

إذا ما قُدمناش غير التصنيع، وإن احنا نعمل علشان نقدر نستوعب الزيادة فى السكان، وربنا يهدينا ونقلل الزيادة فى السكان شوية، يعنى دى مع دى تمشى، أما العمل بس حيتعبنا.

الذرة من مليون طن لـ ٢ مليون ٢٦٢ ألف طن، الزيت من ٧٨ ألف طن لـ ١٥٠ ألف طن، السمن الصناعى من ١٢ ألف طن إلى ٤٣ ألف طن، الشاى من ١٦ ألف طن إلى ٣١ ألف طن، السكر من ٢٨٧ ألف طن إلى ٤٥٩ ألف طن، أقمشة قطنية من ٣٠٠ مليون متر إلى ٤٩٣ مليون متر، الصوف من ٢ مليون و ٣١٥ ألف متر إلى ٨ مليون و ٧٦٥ ألف متر، أدى الزيادة فى الاستهلاك، لو كنا ما اديناش أجور، ولو كنا ما شغلناش حد، ماكانش حصل اللي حصل، كنا استريحنا وقعدنا فى المجتمع الطبقي؛ مجتمع تحالف رأس المال مع الإقطاع، وريحنا نفسنا من البلاوى اللي حطينا دماغنا فيها.

بس هل دى مبادئنا؟! أبدأ.. أبدأ، مبادئنا إن احنا نبني هذه البلد وتبقى فيها حرية، ونقضى على حكم الطبقة؛ حكم الاستغلال ونقيم الشعب العامل.. الشعب كله، ونخلق فعلاً مصر بلد كريمة عزيزة، لكل واحد فيها، ولكل ابن من أبنائها.

طيب ايه مع زيادة الاستهلاك.. بنعمل ايه بقى؟ احنا مهددين مع زيادة الاستهلاك إن النجاح اللي بنعمله بيتاكل، دى المشكلة، والله لو فشلنا وماعملناش خطة الـ ٥ سنوات، كان أسهل، ماكانش شغلنا حد، مش كان يبقى عندي مشكلة عاطلين، وبدل ما يبجي لي جوابات يقول لي بلاش تصدر.. احييني اليوم وموتني بكرة، كان يقول لي والله أنا عايز شغل بأى حاجة.. زى ما كنت قبل الثورة، ما أنا المشاكل اللي عندي النهارده غير مشاكل أول الثورة. أول الثورة كل الجوابات.. كنت باطلع أى رحلة أرجع صناديق عايز شغل.. عايز شغل لدرجة إن احنا قررنا مرة نعمل طرق علشان نشغل الناس، لا.. النهارده عايز بيت، وعايز تليفزيون، وعايز مش فاهم ايه، وعايز.. ويقول لك الله هو التليفزيون ذا كماليات؟! أبدأ.. التليفزيون مش كماليات، احنا حنضحي ازاى؟ الجيل دا ضحي من أجل المستقبل، لا.. طبعاً مشاكل النهارده غير مشاكلي من ١٣ سنة، لو فشلنا كانت المشكلة أسهل، كنت النهارده فى بورسعيد.. يعنى أنا النهارده فى بورسعيد من ضمن الورق اللي جا لي، جا لي طالبين شغل، كنت الأول باجي برضه هنا فى بورسعيد باطلع بمقاطف طلبات شغل، النهارده.. باجي وأنا ماشى باقول لعبد الحكيم مستوى بورسعيد واللبس اللي لابساه الناس أحسن من السنة اللي فاتت.

باين فى الطريق من الناس، ولبس الناس، ووش الناس، وصحة الناس، مجتمع النصف فى المية ما يعملش الكلام دا، احنا مجتمع المية فى المية، لو كنا فشلنا ما كانتش تبقى فيه مصانع عايزه استثمارات، ولا مصانع عايزه مواد خام، ولا سلع وسيطة، ماكانش يبقى فيه عمالة زائدة تستهلك أكثر، والشعب المصرى أنا على ثقة لا يريد ذلك، قلت ما عنديش هدايا أوزعها عليكم، وإنما عندي مسؤولية أضعها على أكتافكم، قلت لم أجي لأعطي وإنما جئت لأخذ، قلت الكلام

دا فى مارس اللى فات، كان فى ذهنى بالطبع أننا قد نلجأ إلى الحد من الاستهلاك حتى نقيم فعلاً مجتمع الـ ١٠٠%، وفى الخريف الماضى فعلاً كان واضح إن هناك عدم تناسب بين الطلب على السلع، وبين ما هو معروض منها، رغم الزيادة الضخمة فيها.

وكان واضح إن احنا لا يمكن أن نترك الاستهلاك يلتهم كل شىء، ولا يبقى للاستثمارات الجديدة شىء، معناها إن احنا نتوقف.. معناها إن احنا نعيش النهارده وننسى بكره.

جالى جوابات على زيادة الأسعار، زى الجواب اللى قلت لكم عليه بتاع ليه زيادة الأسعار؟ أنا مالى ومال بكرة ومال الاستثمارات، ما أنا باشتغل واحيينى النهارده وموتى بكره. هل دا فعلاً منطق الشعب المصرى؟ لو كان دا منطق الشعب المصرى طب كنتم حاربتم ليه واستشهدتم فى بورسعيد؟! كان انهار الشعب المصرى فى بورسعيد، لو كان دا منطق، ماكانش وقف، دى مش أبداً طبيعة الشعب المصرى، لو كان الشعب المصرى طبيعته كده، ما كان من أول الطريق ما رضيش يمشى فى الطريق اللى مشينا فيه، كان قال احنا كويسين فى مجتمع تحالف الإقطاع ورأس المال وحكم الطبقة، نسيب مجتمع النصف فى الميه يعمل واحنا نعمل عبيد ونخدم، واللى خلق الأفواه والناس يتكفل برزقها، ربنا قلت لكم ما قالش كده، ربنا قال "اعملوا"، وعمل قيمة كل إنسان بعمله وبقدرته، ربنا زى ما قلت لكم كان سهل عليه يدينا من غير عمل، هو قادر وقدرته لا تحد، ولكن ترك الإنسان مع ما أودعه فيه من طاقات وقدرات، وطلب منه ألا يستكين، وأن يأخذ أقداره فى يده، ويصنع بنفسه مصيره.

تيجى لى جوابات ويقولوا لى أنت قلت بنرجع بالأسعار لسنة ٦١، ذلُونى بحكاية ٦١، وأنا فى مجلس الأمة، وأنا باتكلم السنة اللى فاتت، واتكلمت وقلت إن فيه الناس بتبعت على غلاء الأسعار، وقلت لرئيس الوزارة إنه يعمل على العودة بالأسعار إلى سنة ٦١، وبعدين جينا بعد كده درسنا الموضوع وجدنا مستحيل، أما شوفنا الأرقام، وجدنا إن العملية مستحيلة؛ ما هى العملية عرض

وطلب، فيه فلوس وفيه كذا مليون أجور، وفيه كذا مليون عامل، وفيه السلع اللي احنا بنتنتجها أهه، واللى بنستوردها أهه، مافيش أكثر من كده، العملية عرض وطلب، إذا لا يمكن الرجوع.

ورحت مجلس الأمة بعد كده - السنة اللي فاتت - وقلت وشرحت، وقلت بعد أن تكاملت الصورة اتضح أن الرجوع إلى أسعار ٦١ مستحيل، دي مآخذش سمعها أبداً، والأولانية سمعوها.. مش متسجل على غير دي.. باقول لهم النهارده مستحيل، اعمل ايه ما هو ما عنديش، لو عندي أنا فلوس استورد وأجيب لكم سلع كنت أجيب، ماحدش عنده فلوس، احنا كده وقدرتنا كده، وطبيعتنا كده، وحالتنا كده. وفتت في مارس اللي فاتت وقلت أنا لم أجي لأعطى، وإنما جئت لأطلب؛ لأن أنا عارف، هو أنا باقول إن أنا.. الخطة الجاية عايزه ٣٠٠٠ مليون جنيه، معدل الادخار في الخطة الأولى كان ١٥%، إذا في الخطة الثانية عايزين معدل ادخار عشان نعمل ٣٠٠٠ مليون جنيه ٢٥%، بتقولوا ياه! دا كثير! باقول لكم فيه بلاد عامله ٣٥% وأكثر، وبتبنى، طب وأنا حابنى منين؟! كل واحد فيكم يوفر جزء، وأنا باخد هذه الفلوس واديها للحكومة، والحكومة بتبنى مصانع وبتشغل ولادكم، وبتديكم عائد، لكن لو ناكل كل الفلوس اللي في أيدينا نصرقها، طب حنبنى منين؟! برضه مافيش مورد نجيب منه فلوس، وبرضه احنا مش مجتمع النصف في المية، والاقتصاد الحر والكلام دا، لأ، احنا مجتمع التخطيط والتنمية، مجتمع المية في المية، ولازم نوجد عمل لكل واحد، ولازم نوجد بيت لكل واحد، ولازم نعمل كذا، ونصلح أرض، ونبنى مصانع.. إلى آخر هذا الكلام.

موضوع ارتفاع الأسعار، في الفترة الأخيرة حصلت إجراءات في ارتفاع الأسعار نتيجتها توفير ١٠٠ مليون جنيه في السنة، واحنا الحقيقة عايزين ١٥٠ مليون جنيه نوفر، نوفر ١٥٠ مليون جنيه.. نقوم نعمل توازن اقتصادى، نمنع السوق السوداء، ونمنع ارتفاع الأسعار العفوى اللي ماشى في البلد دا، ونخلى الفلوس على قَد السلع.

إذا كانت الفلوس اللي في البلد أكثر من السلع يبقى على طول السلع حتختفى، ويبقى فيه سوق سودا وغلاء، إذا كانت الفلوس قد السلع ودى حلها إزاي؟ إذا كانت السلع قليلة استورد، وإذا كان ما عنديش فلوس استورد، يبقى لازم امتص الفلوس. في نفس الوقت عندي عجز في ميزان المدفوعات ٦٠ مليون جنيه، مديون، يعني لازم أدفع ٦٠ مليون جنيه، أو إذا ما دفعتهومش يبقى المصانع بتاعتى حتقف، اللي هي عايزه ١٤١ مليون جنيه، جزء منها ٦٠ مليون جنيه.

الاستهلاك مخيلنى مش قادر أبداً أوازن ميزان المدفوعات، إذا لم يكن هناك مفر من أجل التوازن الاقتصادى، ومن أجل إن احنا ما ندخلش فى مشاكل أكثر السنة الجاية من اتخاذه هذه الخطط، الجزء الأكبر منها ضغط انفاق حكومى، بعد كده رسوم على سلع كمالية، السيارة والثلاجة، والتلفزيون، وأجهزة تكييف الهواء، بتقول لى لأ، دى مش كمالية، باقول لك لو أنا ازود إنتاجها عن الطلب تبقى مش كمالية، لكن الطلب النهارده أكثر، ما عنديش إنتاج حاجيب لك منين؟! ما لازم حاستورد لك، السيارات ٤٠% عملة صعبة، التلفزيون ٣٠% عملة صعبة، بقية الثلاجات فيها جزء عملة صعبة، لسه ما صنعتش الحاجات دى بالكامل. إذا كل ما يزيد الطلب، أنا على أدفع عملة صعبة؛ علشان استورد الأجزاء اللي باشتريها بالعملة الصعبة.

بعد كده اتعملت ضرائب على الشرائح العالية، ثم زيادات فى بعض الأسعار فى الحاجات الضرورية، ولكن احنا زودنا السكر قرشين - الحر - سكر التموين ما زادش، اللي زاد السكر خارج البطاقة. الأدوية احنا خفضنا من ٣ سنين الأدوية ٢٥%، ولكن فى الفترة اللي فاتت دى زودنا بعض الأدوية بنسبة ١٠%، وهى الأدوية الكمالية زى الفيتامينات، حتقول لى ليه؟ تعرفوا كنا بنستهلك فى أول الثورة أدوية بـ ٦ مليون جنيه، عارفين السنة دى مستهلكين أدوية بكام؟! ٣١ مليون جنيه، بعدما خفضنا الـ ٢٥%، ٣١ مليون جنيه، من ٦ مليون لـ ٣١ مليون، النصف فى المية كان بيتعالج، والباقي ماكانش بيتعالج،

النصف فى المية ومحاسبيهم اللى بيشتغلوا معاهم بيتعالجوا، والباقى مايتعالجش.. مجتمع المية فى المية النهارده احنا لسه لم نحققه كاملاً، لكن بيتعالج.. بياخدوا الدواء، اللى كان ما بيشفوش الدواء ولا ما بيعرفش عنه بيشفوه، بنستهلك النهارده دواء بـ ٣١ مليون جنيه. زادت أسعار بعض الأقمشة، ولكن الأقمشة الشعبية ما زادتش بأكثر من قرش واحد للمتر الأقل من ٢٠ قرش.

أنا كنت أتمنى ألا تزيد الأسعار مليم واحد، ولكن كنت أتمنى زى ما قلت لرئيس الوزارة إن نرجع لأسعار سنة ٦١، دا اللى أنا كنت عايزه وباتمناه، ولكن دا مستحيل.

وإذا كنا مشينا بدون الإجراءات اللى حصلنا فيها دى، كنا دخلنا فى خلل اقتصادى وعدم توازن اقتصادى، واتلخبطت كل الأمور، والمصانع وقفت، اللى المفروض نستورد لها خامات وسلع وسيطة من الخارج، ومع ذلك باقول لكم إن زيادة الأسعار عالمية، ونترك العالم كله ونبص حوالينا، وحوالينا ما حدش بيتحمل أعباء تنمية، وما عندهمش زيادة السكان عندنا، وبنقارن الأسعار بيننا وبينهم بنجد إن احنا برضه لازلنا بلد رخيص، وبالنسبة أيضاً لبلاد العالم نعتبر من أرخص البلاد، ما زلنا من أرخص بلاد العالم.

وباقول لكم كان ممكن الحل بقى إيه؟ الحل إذا كنت ما عملتش زيادة أسعار قدامى حاجتين: يا ما اعملش مشاريع، وما اشغلش حد، وأجمد العلاوات، وأرقد الزيادة عن العمل، يبقى عندى عاطلين وبارجع لمجتمع واقف فاشل.. إلى أخره، يعنى نصبح دولة من العاطلين، دا الحل البديل؛ يا كنا نرفع الأسعار يا نعمل كده، الأسلم إن احنا نرفع الأسعار، ورفع الأسعار هو ضريبة بنتعامل فيها.

بيبعثوا لى جوابات بيقولوا لى تاخذ منا ما تاخذ من الكبار! ما فيش فايده! المجتمع اختلف، احنا ذوبنا فعلاً الفوارق بين الطبقات، طب تعرفوا احنا عاملين الشرايح على الدخول العالية، ما تجبش حاجة تجيب كام؟! ٢٠٠ ألف جنيه،

مافيش! يعنى كان زمان لو نعمل أيام حكم الطبقة.. لو نعمل الضرايب بهذا الشكل كانت تجيب، النهارده ما تجيبش.

اللى باقوله النهارده إن احنا نستطيع إن احنا نطلب ضمانات ألا يتحول ارتفاع أسعار بعض السلع إلى دوامة تجر كل السلع، وتخلق موجة عامة من الغلاء، ودا رئيس الحكومة تعهد به قدام مجلس الأمة، وعنده تفويض إن أى محل يرفع الأسعار فى أى صنف غير الأصناف، اللى صدرت بها هذه الإجراءات بيستولى عليها ويقفله؛ علشان ما يستغلوناش تجار السوق السودا.

الشيء الثانى: نوجه كل شيء للاستثمار، ونضاعف جهود الإنتاج لانطلاقة أكبر، مثل هذه الضمانة بيطلبها الشعب، والناس بتطلبها، فيه ناس طبعاً عاقلين ببيعتوا لى جوابات كثيرة يعنى بيقولوا وفاهمين كل حاجة، بس بيقول لك مافيش داعى إن يكون فيه دوامة فى ارتفاع الأسعار، الحكومة بتضرب على المستغلين فى السوق السودا.. إلى آخر الكلام دا.

كل دا بننظمه، قد يكون فيه سوء التوزيع، هو سوء فى العملية دى، كل دا بنراجعه النهارده، وكل دا ممكن ننظمه، وهذه الضمانات لايد إن مجتمع ١٠٠% يطلبها؛ لأنها ضمانات ضرورية له.. ضمانات أساسية، مجتمع ١٠٠% مطالب أمام نفسه، وأمام الأجيال القادمة، وأمام أمته أن يعمل ليحقق الأهداف الكبرى التى حمل أمانتها ومسئوليتها، عايزين نضاعف الدخل القومى فى ١٠ سنوات، عايزين نضاعف الإنتاج، الإنتاج كان عندنا سنة ١٩٥٢ (١٨٠٠) مليون جنيه، سنة ٦٤/٦٥ (٣٤٧٤) مليون جنيه بالأسعار الثابتة، أسعار سنة ٥٩.

عايزين فى السنة الأولى من الخطة الثانية إن احنا نرفع الادخار من ١٥% من الدخل القومى إلى ١٧ أو ١٨%، عايزين فى السنة الخامسة فى الخطة إن احنا نرفع الادخار إلى ٢٥%؛ علشان تخلقوا مجتمع قوى الشعب العاملة، أماننا إلى سنة ٧٠ بمشيئة الله، موعد إتمام خطة مضاعفة الدخل القومى، سنوات من العمل، ما قُدْمَنَاش غير العمل فى بلدنا، بنعمل زراعة، وبنعمل صناعة، بنعمل

كهرباء، بنعمل تنمية فى جميع الميادين، نعمل خدمات ونطور الخدمات، ونوفر التعليم لكل الناس، ونرفع المستوى، بندعم السلطة السياسية لقوى الشعب العامل، بنعمل فى كل محافظة، وفى كل قرية، وفى كل مدينة، كل مكان فى مصر يجب أن ينبض بالنشاط، هو دا رأسالنا الأساسى.. العمل.. العمل.. العمل.

بورسعيد أنتم فى المرحلة الجاية لكم دور خاص؛ وهو إنجاز مشروع الميناء الحر، ومش معنى هذا إن احنا حنطلع بورسعيد بره المجتمع الاشتراكى، زى ما طلعت بعض منشورات هنا، وانتقلت بهذا الشكل من مدة، أبدأ احنا بلد اشتراكى، بنمشى الاشتراكية وفق ما يناسبنا، زى ما قلت لكم مافيش باباوية فى الاشتراكية؛ نقضى على استغلال الإنسان للإنسان، ولكن كل شىء نكسب منه للشعب، مش لفرد أو لأفراد بنعمله.

هو دا المجتمع الاشتراكى كما نفهمه، مافيش حاجات أبداً محددة، اللسى بيناسبنا بنعمله واحنا ماشيين، فيه قطاع عام وفيه قطاع خاص، ومش معقول احنا حنيجى فى القطاع الخاص ونؤم مثلاً الحلاقين، واللا الجزمجية واللا الترزية، أبدأ.. دا موضوع مش موجود فى الميثاق، ومش ممكن يحصل فى مجتمعنا، ودى الاشتراكية زى ما احنا فاهمينها، زى ما هى فى راسنا، ومش معقول حنؤم الدكاكين، حنسيب الدكاكين، ولكن حنزود الجمعيات التعاونية، قد تكون فيها مشاكل، ولكن بنحل هذه المشاكل، بنمشى فى الاشتراكية بتاعتنا زى مصلحتنا، زى النتائج الكويسة اللى بتعود علينا منها. فيه ناس قالوا إن الميناء الحر دا بيتنافى مع الاشتراكية! باقول أبدأ.. أى حاجة نكسب منها هى اشتراكية، طالما مافيش استغلال الإنسان للإنسان.

### أيها الإخوة:

أنا واثق إن الشعب بتاعنا سيتحمل مصاعب فى المرحلة القادمة، برضه باقول إن احنا ما بنضحش، أما احنا قلنا فى الميثاق إن احنا مش عايزين نضحى بجيل من أجل أجيال مستقبلية؛ كنا نقصد حاجات كثيرة قوى ما حصلتش

هنا أبدأ، احنا ما بنضحيش، بالعكس احنا بنحاول بأسرع ما يمكن نخلق مجتمع ١٠٠%؛ ادينا فرص العمالة.. قللنا ساعات العمل، شاركنا العمال، وزعنا الأرض، شاركنا العمال فى مجالس الإدارة، وزعنا الأرض.. إلى آخره... وهدفنا أن ندعم فعلاً المبادئ اللي قامت عليها هذه الثورة، اللي قالها الميثاق؛ إقامة مجتمع حر، إقامة مجتمع قوى، وسبيلنا فى هذا العمل.. وأنا على ثقة أن الشعب المصرى فى كل مكان سوف يحقق مهام المرحلة المقبلة فى كل ناحية من النواحي.. يعنى فيه شكوى من إن العمال بيغيبوا، وأنا باقول إن العامل اللي بيغيب بدون عذر بيخون كل العمل اللي احنا بنعمله من أجله، والقروش اللي احنا بنلمها من بعض وبنبنى بها، بنبنى بها بلدنا، وبعدين بعد كده بناخد إجراءات، بنعدل على طول، ونقول إن العامل اللي يغيب كذا يوم يترفد، إذا ماكانش فيه شعور بالواجب قصاد الشعور بالحق، دا لا يمثل العمال كعامل، ولكنه يمثل عضو فعلاً مريض فى المجتمع.. طبعاً لازم تزيد الإنتاجية علشان تزيد السلع، علشان نقدر نواجه الاستهلاك، مين اللي بيقوم بهذا؟ العمال والإدارة.

واثق إن الشعب سوف يحمل العبء الكبير، وحنبنى إن شاء الله، وسنة ٧٠ نضاعف الدخل القومى، ونفتخر فى العالم كله، ونقول أدينا ضاعفنا الدخل القومى فى ١٠ سنوات فى مصر إن شاء الله، بالقروش اللي بنلمها، والقروش اللي هى القرشين بتوع السكر، والقرش بتاع القماش، والكلام دا بأوجد فرصة عمل لأولادكم، وفرصة عمل لإخواتك، واللى حيثخرج من الجامعة، وأديك فرصة بتودى ابنك الجامعة مجاناً، مهما كنت عامل مآ أنتاش عامل ابنك بيقدر يروح الجامعة، وأنا أعرف ناس فعلاً ماكانش يحلم إن ابنه يروح الجامعة، عندهم أولاد النهارده دكاترة وكذا، ونفخر لأن دول أبناء المجتمع ١٠٠%، مش مجتمع النصف فى المية.

فاضل حاجة بسيطة؛ احنا زى ما قلنا شعب ما عندناش موارد كبيرة، ولكن شعب عندنا مبادئ كبيرة، ومن أجل هذه المبادئ رحنا اليمن، وقمنا فى اليمن

بواجبنا كما نشعر به؛ نصره المبادئ، قمنا في اليمن بواجبنا العربي، ونحاول الآن أن نحل المشاكل بسلام، بكل أسف مؤتمر حرض ما وصلش إلى حل، إذا لازم احنا نثابر حتى نستطيع أن نصل إلى حل وفقاً لاتفاقية جدة، ودا اللي احنا حنعمله.. النهارده سامع في راديو لندن الصبح الساعة ٧ تصریح؛ بيقلوا صرح الملكين إنهم حيفاتلوا الجمهوريين بعد شهر، والله إذا ابتدوا حنضربهم ببساطة، يعنى مافيش كلام تانى، ولكن احنا بنقول عايزين السلام، وعايزين نحل المشاكل في سلام، ودى مبادئنا، وبعدين برضه بنقول احنا ناس ما عندناش موارد كبيرة، ولكن عندنا مبادئ كبيرة، ومن أجل هذا قطعنا علاقتنا في الأسبوع اللي فات مع إنجلترا وفقاً لقرارات مؤتمر القمة الإفريقي، اللي قطعوا علاقتهم ٩ دول احنا أحدهم، ودا واجبنا، وواجبنا لا يمكن إن احنا نتردد فيه بأى حال من الأحوال.

من أجل فلسطين احنا بنعمل وبنبنى جيشنا.. ومن أجل فلسطين احنا اتفقنا على وحدة العمل العربي.. ومن أجل فلسطين النهارده الدول العربية بتتسلح، وربنا يهدى الدول العربية كلها علشان فعلاً نستطيع إن احنا نحرر فلسطين، كما يتمنى الشعب العربي والأمة العربية في كل مكان.

ومعركتنا مع الاستعمار ومع الصهيونية معركة كبيرة، وأمامنا واجبات ضخمة في الداخل، وواجبات ضخمة في الخارج، ولا نستطيع الحكومة، ولا أستطيع أن نقوم بهذه الأعباء إلا بتعبئة جهود هذا الشعب الطيب، هذا الشعب العظيم. والله يوفقكم جميعاً.

والسلام عليكم ورحمة الله.